

SENSE YA KULUTILA



Mu ke na kusalaka dyaka feti, mpe, na lusakumunu yango na suka yayi.

Oh, ya kulutila mingi, ya kele ya kuzabana ve, bima yina Nzambi ke sala samu na beto ntangu beto ke vukana beto mosi kintwadi! Benoit me tala tuka beto me sala kupesama yayi na Nzambi, mutindu ti bima ke na kukwenda awa? Lusakumunu na manima ya lusakumunu, ngolo na manima ya ngolo, nkembo na manima ya nkembo! Ya me vwanda kaka mbote. Mpe Yandi ke landila na kusala mutindu yina. Bamuswale yayi, mu me sambila yawu, kana—kana ya kele ya muntu mosi awa.

² Ntangu yayi mu zola kaka kupesa mulabu na yawu, kaka mwa ntangu fyoti, mpe ya ntete mu ke tonda benoit nyonso samu na dikabu ya benoit ya kitoko ya Nowele, ya kazaka yina benoit me sumbila munu. Ya vwandaka yina vwandaka na kati ya nge, Mpangi Neville? [Mpangi Neville me tuba, “Yinga, tata. Yinga, tata.”—Mu.] Yinga, tata. Kazaka. Milongi lenda sadila ntangu nyonso kazaka. [“Ya me lunga munu mbote.”] Ya kele mbote! Ya kele mbote. Ntangu yayi, bawu ke toka, mpe kutoka yina ke bebisaka bilele mbangu kulutila kima nyonso yina mu zaba, benoit me mona. Mpe yina ke lomba kaka ti mulongi kuvwanda na bilele mingi, mpe bilele ya mbote. Koto ya mbote ya kilele ke beba kaka, kaka na ntangu fyoti. Na yawu, kazaka ya mbote mutindu yina ke vwanda mwa bilumbu mingi.

³ Mpe benoit banza kaka, benoit ke simbidila mpe ke pesa bilele yayi na kisadi ya Mfumu. Mpe Mfumu sakumuna benoit. Yesu tubaka, “Bambala nyonso yina benoit salaka ya fyoti na bampangi ya Munu yayi, benoit me sala yawu na Munu.” Na yawu kuna benoit me nata ata mbala mosi ve, me sumba bakaza ya milongi zole; benoit me sumba bakazaka zole samu na Yesu. Uh-huh. Yawu yina Yandi tubaka, “Benoit me sala yawu na Munu.”

⁴ Kasi mwa kusimba ya Mazulu yina, na suka yayi, benoit me bakula yawu? Lubokilu na autel ve, kima mosi ve; kasi kaka na manima ya Nsangu mpe—mpe madidi ya Mpeve-Santu me kubwa na zulu ya bantu, nkembo ya Nzambi me tambula, bawu me banda kaka na kumata, mpe kukulumuka, bisika nyonso. Mpe mu me tala mwa bankundi ya munu ya mbote mingi ya ba-Baptiste, ya Baptist Church ya Bala-bala Walnut, na Louisville, bayina vwandaka ya kutelama na kulwale, vwanda yobila kaka na kati ya Ngolo ya Nzambi. Oh, la la! Bawu, mu kutanaka na bawu na manima ya lukutakanu, bawu tubaka, “Yina kele Ngolo ya Nzambi.”

Mu tubaka, “Ya kele kieleka. Kieleka... Benoit kele kieleka ya kusungama. Ngolo ya Nzambi!”

⁵ Mpe beno lenda kaka ve kuzwa bampova ya kutuba. Beno zaba kaka ve yinki ya kutuba. Mpeve-Santu me baka kaka lukutakanu mpe beno zaba ve yina Yandi ke sala na yawu. Na pima nyonso, na kukikulumusa nyonso, yina me bukana. Oh, Mpangi Pat, yina ke kaka Zulu, samu na munu. Mu kele kaka mosi ya mutindu ya ntama yayi yina ke zolaka sentima yina na kati ya Yawu, beno me mona.

⁶ Mutindu Paul Rader ya ntama, yandi tubaka na ya yandi . . . Kilumbu mosi yandi vwandaka tuba disolo. Mpe yandi tubaka ti yandi na kento ya yandi vwandaka ya kuvwanda na mesa, mpe kento vwanda zola kukwenda kisika mosi to kusala kima mosi, mpe yandi landilaka na kutuba na kento, “Mu lenda kaka ve kusala yawu,” mpe nyonso yina, mpe yandi zolaka nyongisa yandi mwa fyoti.

⁷ Na yina yandi talaka yandi, mpe masa ya meso vwandaka kulumuka na matama ya yandi, mpe yandi tubaka na yandi, yandi tubaka, “Mbote, ntangu yayi . . .” Yandi banzaka na kati ya ntima ya yandi, “Uh, kana yandi ke nyongaka na kima nyonso, na yina ya me tala yandi.” Na yawu yandi, mutindu bakala, mutindu yandi futikaka mukanda ya yandi mpe bikaka yawu na ndonga.

⁸ Mpe yandi ntangu nyonso vwanda telamaka na kielo mpe ke pesa bakala bize na kuzonza bayi-bayi. Mpe na yina ntangu bakala vwanda basika na mwelo, yandi vwanda pepisa diboko na kuzonza yeyeye, mpe kuna yina zolaka—yina zolaka lunga, beno zaba, tii yandi ke katuka na bureau ya yandi.

⁹ Mpe na yina na suka yina, yandi tubaka, ntangu yandi vwandaka basika, na yina, . . . na kielo, mbote, kento vwandaka ya kutelama pene-pene ya kielo, mpe bakala pesaka yandi bize mpe tambulaka na ngaanda tii na nsuka ya mwelo. Yandi zibulaka mwelo, yandi talaka na manima, mpe yandi vwandaka ya kutelama na kielo na yintu ya yandi ya kukulumusa, ya kunyonga, yandi tubaka ti yandi pepisaka diboko na kuzonza bayi-bayi, yandi tubaka ti kento pepisaka diboko mpe na kuzonza bayi-bayi.

¹⁰ Yandi tubaka ti yandi bandaka na kutambula na bala-bala, mpe yandi bandaka na kubanza, “Yinki kana kima mosi kusalama na munu ntete mu vutuka na yinzo, to yinki kana kima mosi kusalama na yandi ntete mu vutuka, ti Nzambi baka luzingu ya beto; mpe mutindu ya mbote ya kento yandi me vwanda, mutindu mbote yandi kele, mpe nyonso yankaka yina?” Mpe yandi tubaka, ntama yandi kwendaka, mingi ntima ya yandi vwanda kuma nene.

¹¹ Na yina yandi balukaka mpe vutukaka, zibulaka mwelo, kimaka mbangu na yinzo, zibulaka kielo. Mpe ntangu yandi zibulaka kielo, yandi kuwaka kima mosi kudila. Yandi talaka na ziunga, kento vwandaka ya kutelama na manima ya kielo. Yandi

ata mbala mosi ve ti yandi tubaka “lemvokila munu,” ata mbala mosi ve ti yandi tubaka “Mu ke lomba pardo,” ata mbala mosi ve ti yandi tubaka kima. Yandi tubaka ti yandi bumbaka kaka yandi mpe pesaka yandi dyaka bize, yandi balukaka mpe yandi kwendaka. Yandi tubaka ti yandi basikaka na mwelo, yandi tubaka ti kento vwandaka ya kutelama dyaka na kielo. Yandi tubaka, “Bye.” Mpe kento tubaka, “Bayi,” yandi tubaka, kaka mutindu yandi salaka na mbala ya ntete, kasi ya mbala ya nsuka yina, ya vwandaka na sentima na yawu.

¹² Na yina ya kele mutindu yina, na ntangu ya kele na sentima na yawu, beno me mona, ti ya kele kieleka kima me katuka na Nzambi.

¹³ Ntangu yayi, ya kele na nsodolo me salama mwa ntangu fyoti me luta, ya administrateur ya malu-malu, Mpangi Sothmann. Mu ke ndima ti ba-administrateur, bawu nyonso, kele ya kuzaba ntangu yayi, ti, na nsuka ya konso mvula, na kilumbu ya ntete ya Ngonda ya ntete, ti bisalu nyonso ya dibuundu, mutindu ba-pasteur mpe ba-diacre, mpe nyonso yankaka, ke sukaka. Na yina kana bawu zola kulandila. . . Ntangu yayi, ba-pasteur, mu zolaka tuba yawu ve. Mu zolaka tuba ba-administrateur, mpe ba-diacre, mpe milongisi ya lukolo ya Lumingu, mpe nyonso yankaka. Bawu. . . Pasteur kele ya kusoola na dibuundu, mpe yandi ke vwanda tii, tii. Mpe na yina—na yina bawu. . . Kana bantu, conseil ya ba-administrateur, to ba-diacre, to milongisi ya lukolo ya Lumingu, to yinki dyaka, kana bawu zola kulandila, bawu landila kaka. Kana bawu zola ve, na yina bawu fwana—bawu fwana zenga kana bawu zola ve kulandila. Mpe ya kele ve na dyambu na bawu, na yina ba ke landila mvula ke kwiza. Mpe—mpe na yina kana bawu landila ve, na yina bawu ke sala nsodolo, mpe ke soola mwa administrateur yankaka, to—to kisalu nyonso yina ya vwandaka.

¹⁴ Na yina, ya ke kwika ve muntu, ti luzingu ya yandi ya muvimba, yandi kusala kisalu na conseil. Kasi ntangu nyonso yina yandi ke kuwa ti Nzambi kele na yandi mpe ke na kusadisa yandi, mpe yandi mpangi-bakala zola kusala kitini ya yandi, to mpangi-kento kitini ya yandi, nyonso yina ya lendaka vwanda, samu na kulandila na kisalu ya Nzambi, beto ke vwanda ntangu nyonso na kyese na kuzwa bawu na kusadila na beto. Beno me mona? Kasi mutindu yina ya ke pesaka muntu siansi ya kusadila mvula mosi mpe kumona mutindu bawu zola yawu. Bayankaka ya ba-administrateur ya beto ke bikala bamvula mpe bamvula mpe bamvula, mpe ba-diacre mpe, mpe yina kele kieleka mbote. Kasi na yina ya kele ve na ntangu. Kana administrateur, to pasteur, to muntu mosi na kimvuka ya bisalu, kuwa ti bawu lenda sadila dyaka ve, to zola kubika, na yina bawu zabisa kaka dibuundu, samu ti bawu kuzwa muntu na kisika ya bawu.

¹⁵ Mpe ya kele yina salamaka awa, na nkokila yayi, na Mpangi Morgan, Mpangi William Morgan me bika kisalu mutindu

administrateur. Ba vwandaka na nsatu ya administrateur yankaka. Mpe ba me soola Mpangi Sothmann mutindu administrateur, na ntangu yankaka, mpe na manima ba yambaka yandi na nkokila yayi na kimvuka ya ba-administrateur.

¹⁶ Ya kele lutumu, ntangu nyonso ya kele dibuundu. Na dibuundu ya beto, ya kele kimpwanza ya dibuundu. Dibuundu ke katula, to ke tula administrateur, dibuundu ke katula pasteur, to ke tula pasteur. Nyonso yina ya kele, ya kele dibuundu na nyonso. Ya kele buntumwa. Ya kele mutindu ya vwandaka salama na ntangu ya Biblia. Na yina, beto ke kuwa ti muntu mosi ve, na yina, kele ntwadisi ya nkú to kima mosi na kati ya dibuundu. Beto zola yawu ve. Konso muntu, muntu nyonso, munu mosi, na kuvoteke muntu nyonso, mpe kele kaka na voti mosi, kaka mutindu muntu nyonso yankaka ya dibuundu awa, kaka voti mosi. Ya kele ve yina mu ke tuba; ya kele yina dibuundu ke tuba, beno me mona, yina dibuundu ke tuba na kati ya nzutu. Beno zola yawu? Oh, mu banza ti ya kele kaka Masonukwa. Ya kele mutindu ya zolaka vwanda.

¹⁷ Ntangu yayi, yayi ke vwanda sabala mosi ya nene samu na munu, kubanda, mbasi, kana Mfumu kuzola. Mu fwana baka balukanu samu na mvula ke na kwiza, samu na balubokilu nyonso. Mu zola kukwenda na—na bilo mpe kubaka balubokilu ya munu nyonso mpe kunata yawu na yinzo. Na yina, samu na mwa bilumbu ke kwiza, mu kwenda sambila, na Nzambi, mpe kusambila Yandi na kutwadisa munu mpe kulakisa munu wapi nzila ya kukwenda mpe yinki kusala. Beto ke zingaka ve na ntangu mutindu ya vwandaka ntangu Yandi vwandaka awa, kisika Nzambi vwanda twadisa Yandi katuka kisika na kisika yankaka, mpe Yandi vwandaka na kati ya mbanza mosi bangunga fyoti mpe ke kwenda na mbanza yankaka. Kasi bubu yayi ya kele na sysiteme ya kuswaswana, ya kele kuvwanda mpe kubongisa, na kimvuka ya milongi mpe mingi ya bima fwana salama.

¹⁸ Mpe mutindu mu ke salaka yawu, mu ke nata balubokilu ya munu nyonso ya Afrika mpe kutula yawu na yisi, balubokilu nyonso ya Inde, mpe nyonso ya Californie, ya Utah, mpe balubokilu nyonso yankaka, mpe kukabula yawu na bikunku. Mu ke bika yawu kuna. Mpe na manima mu ke kwenda tambula mpe kusambila, ya lendaka vwanda kukota na ditoma ya munu mpe kukwenda kilumbu mosi to zole. Kuvutuka, kulandila kusambila. Kima ke kwiza na ntima ya munu na kukwenda na kisika mosi, kuna mu ke mona kana ya kele kaka dibanza. Kuna, na manima, na yina mu . . . kana ya bula munu ngolo mingi, mu ke kwenda na kikunku yayi kisika kisika yango yayi kele, kuna mu ke baka mukanda mosi mpe ke tanga yawu, ya lubokilu, samu na kumona kisika ya kele. Na yina, katuka kuna.

¹⁹ Beno tala kikuma mu ke salaka yawu. Beno ke banza

na kutambula pene ya bangunga makumi sambwadi na zole na mpepo, na bitembo, mpe kumata mpe kukulumuka, mpe kubaluka, kana beno me kwendaka ntete na bayinsi ya nzenza. Beno zaba ve! Bantangu yankaka beno kele na zulu, mpe bantangu yankaka ya kele na yisi, mpe ke ningana, mpe ke natama, mpe ke tekita, na nzila ya matuti yina mpe na zulu ya maza yango, bilumbu tatu mpe bampimpa tatu. Na manima beno ke tula dikulu na yinsi mosi, mpe kima ya ntete ke kutana beno kele Satana, “Mbote, nkonga ya milongi me tuba *yayi*. Bayankaka ya bawu ke kabuka na voti, mpe bayankaka ke ndima.” Beno me mona?

²⁰ Na yina beno lendaka tuba yayi, “Mbote, mu banza ti Mfumu me zola ve ti mu kwiza.”

²¹ Kasi ntangu ba me tinda beno na Nzambi, beno me kubama na kukutana mbeni. Beno ke tuba, “Mu me kwiza awa, na Nkumbu ya Yesu Klisto. Mu me kwiza na Nkumbu ya Mfumu Yesu, mpe mu ke vwanda awa tii kisalu ya Yandi ke nungama.” Beno me mona? Mpe beno me kubama na kukutana bangolo.

²² Na yawu, beno zola munu, mu zaba ti beno zola munu. Na yawu beno sambila samu na munu, sabala yayi, ti mu ke baka balukanu ya mbote, na nzila ya lutwadusu ya kimpeve ya Nzambi ke twadisa munu.

²³ Ntangu yayi mu ke kuzwa mwa, yina mu ke bokilaka, mwa balukutakanu yina ke dumukaka. Mu ke na kwenda kuna na Floride, na kilumbu ya nana, ya yivwa mpe ya kumi ya ngonda yayi; to, na Tifton, na Georgie. Na Tifton, na Georgie, na kilumbu ya nana, ya yivwa mpe ya kumi ya Ngonda ya ntete, mu zolaka kutuba, na kisika ya kuzonza ngonda yayi. Mpe na manima mu fwana kwenda na Glasgrov, na Kentucky; mpe mu banza na Somerset, na Kentucky; mpe nkokila mosi, mpe mu banza na Campbellsville, na Kentucky. Mpe—mpe Mpangi Rogers vwanda zola ti mu kwiza nkokila mosi, na kisika ya yandi, yina beto kuzwaka...yina beto kondwaka na kuzwa kilumbu yankaka yina.

²⁴ Ntangu yayi, beno sambila samu na Mpangi Rogers. Beto vwanda kuzwa kubundana, bubu yayi, mpe mu simbaka diboko ya yandi mpe mu monaka yandi na mutindu ya yimbi, na nzutu. Na yawu beno sambila samu na Mpangi Rogers awa. Yandi me baka mingi na maboko ya yandi, mpe ya me kumisa yandi kidi-kidi mpe ya kukwamisa, mpe yandi kele—yandi kele na mavimpi ya yimbi mingi na ntangu yayi, mpe kento ya yandi kele yimbi mingi. Na yawu beno sambila samu na mwa bantu yina zole, bana ya mbote ya Nzambi. Mpe mu tubaka na yandi ti, kana Mfumu kuzola, mu ke kuzwa yandi nkokila mosi.

²⁵ Mpe Mpangi Ruddell, mwa ya beto...mosi ya mabuundu ya beto ya fyoti yankaka, awa na bala-bala ya makumi sambanu na zole, mwa mwana ya bakala ya ntama ya nsoni, yandi vwanda

kwizaka awa mpe vwanda lendaka mpe ve kutala na zulu. Mpe yandi vwanda kwizaka na yinzo. Mpe, oh, mu banza ti bantu vwanda banza ti yandi vwandaka muntu ke kwamisa, kasi ya vwandaka na kima mosi samu na mwana-bakala yina monanaka kieleka. Mu landilaka kaka na kuvanda na yandi, mpe na kuvwandaka na yandi, mu tubaka, “Mpangi Ruddell, nge lenda.”

²⁶ Yandi tubaka, “Mpangi Branham, mu ke lenda ve na kutelama na ntwala ya nkonga ya bantu, ntima ya munu—ya munu ke kwiza na laka ya munu. Mpe mu—mu—mu lenda tuba kaka mpova mosi ve.”

²⁷ Mu tubaka, “Telama kuna mpe mina yawu, mpe zonza, na Nkumbu ya Mfumu.” Beno me mona? Mpe ntangu yayi yandi kele na tabernacle ya nene mutindu yayi, awa na bala-bala ya nene, ke sala kaka kima mosi. Beno telama na yawu. Mwana-bakala yango vwandaka na lubokilu ya Nzambi. Mu zabaka tata ya yandi, mama ya yandi. Bawu kele bantu ya mbote mingi.

²⁸ Mpe kuna beto zolaka kuzwa Junie, nkokila mosi, kuna na New Albany. Mpe, oh, beno zaba, kaka mwa balukutakanu ya fyoti, yina mu lenda kuzwa nkokila mosi awa mpe nkokila mosi kuna.

²⁹ Tii, kana bima nyonso kusalama landila manaka, pene ya kilumbu ya makumi zole na tanu ya Ngonda ya ntete, mu ke kwenda na Miami, samu na Lukutakanu ya Yinza ya Muvimba ya Bantu ya Mumbungu ya Miklisto ya Nsangu ya mbote ya Muvimba. Mpe katuka kuna, na Kingston, na Haiiti, kukulumuka na Amerika ya Sude, mpe kumata na Mexique. Mpe katuka kuna, na Afrika. Katuka Afrika, kumata na Scandinave. Mpe nyonso yina, mutindu yina. Kitini ya kulutula nene ya mvula, mu banza, ke vwanda na balukutakanu ya bayinsi ya nzenza. Na yawu beno sambila samu na munu, mu fwana baka lukanu ya mbote.

³⁰ Ntangu yayi, ya kele kaka kana ya kele luzolo ya Mfumu. Kana ve, mu zola kwenda kisika mosi, kisika nyonso. Ya ke sala dyambu ve kisika ya kele, mu zola kukwenda. Kasi ntangu nyonso yina mu kele na lenda ya kutelama na fundu-fundu yayi ya ntoto yina Nzambi tulaka munu na kati, Mu zola kulunga bimvwama ya Yandi yina ba lendaka kondwa ve tii lufwa ke katula munu na nzutu yayi. Yina kele dikani ya munu, na nzila ya lemvo ya Nzambi, kana Yandi ke sadisa kaka munu. Kana Yandi katula diboko ya Yandi na munu, dyabulu ke kufwa munu. Na yawu beno sambila kaka ti Nzambi ke bumba diboko ya Yandi ya kyadi na zulu ya munu.

³¹ Mu ke lombamba ve ludedomo ya Yandi. Mu ke lombamba kyadi ya Yandi. Beno me mona? Ntangu yayi, ludedomo ya Yandi, ve, mu ke lenda ve yawu. Kaka kyadi ya Yandi kele yina mu ke na kulombaka, samu ti mu zaba ti mu kele ve ya kulunga, mpe

muntu ve kele. Mpe beto ke sala mbote na kulomba ve ludedomo ya Yandi. Beto zola kyadi ya Yandi.

³² Ntangu yayi, na nokila yayi, mu kele na ndinga kele mwa ya kukangama, kasi mu lendaka ve kubika bweso, ya kuzonza na nkonga yayi ya mbote ya Miklisto. Beno vingila, kaka ntete mu sala nsamununu yayi, beno bika mu tuba kima mosi. Na yina beno nyonso kele na ntima mosi ntangu yayi, na ngwisani mosi, mpe bima nyonso ke tambula mbote-mbote, beno bika mu tuba mwa baminuti zole na dibuundu ya munu. Beno me mona?

³³ Beno kuwa, ba-cheri ya munu na Nsangu ya mbote, ya munu. . . bambwetete na yimpu ya kimfumu ya munu, kana mu ke kuzwa mosi, yina ba me futa na Menga ya Yesu. Mu ke sala yayi samu na lukanu mosi, munu kuvutuka mutindu yayi. Beto bakaka lukanu yina na nzyetolo ya kuzomba, Mpangi Roy Roberson, Mpangi Banks Wood, mpe munu, na nzyetelo mosi, ti beto lendaka nata, kuvutuka. Mpangi—Mpangi Roy mpe beto nyonso vwandaka zonzila, mpe yina me tadila pasteur ya beto, Mpangi Neville, mpe muntu yina kele na ntuala ya beno ntangu nyonso, ke sala kisalu ya pasteur mpe nyonso, beto zola yandi. Kasi, dyaka, Mpangi Neville kele pasteur ya zole, ya ke monana kaka mwa mpasi samu na Mpangi Neville samu na kukota na yawu. Beno me mona? Na yawu beto sambilaka, mpe ya monanaka ti ya vwandaka luzolo ya Mfumu ti mu sala yawu. Ntangu yayi, mu yufulaka Mfumu kana Yandi lendaka sadisa munu, mu ke sala nyonso mu lenda sala.

³⁴ Mpe na manima me kukipesa munu mosi, mpe na manima ya kusala yawu, me kuzwa dibuundu na kusala mutindu yina. Ntangu yayi, kana Nzambi sakumunaka beto mutindu Yandi me sala na mwa balukutakanu me luta, na mwa kukipesa yina ya fyoti, yinki Yandi ke sala kana beto landila yawu? Beno me mona? Beno landila kaka yawu. Ntangu yayi beno kuwa. Beno kele na zola na mosi na yankaka. Mutindu mu me mona beno kutelama na bakulwale, na suka yayi, mpe sabala yayi, na maboko ya beno na Nzambi, mpe—mpe Mpeve ya luzolo ke tambula, na zulu ya beno!

³⁵ Ntangu yayi beno kuwa ve kima mosi ya yimbi yina dyabulu fwana tuba. Beno me mona? Kana dyabulu lakisa beno mwa, to kutuba na beno kima ya yimbi, na yina me tala mosi ya bamambele ya Nzutu ya Klisto, beno kwikila yawu ve. Samu ti, kaka na ntangu beno ke kwikila yawu, beno ke bebisa kimbangi ya beno.

³⁶ Mpe kana beno mona mosi ya bamambele ya Nzutu ya Klisto kusala kima ya yimbi, kutuba na muntu yankaka ve. Kasi beno kwenda na mambele yina, mpe na zola, mpe beno mona kana beno lenda vutula yandi dyaka ve na Klisto. Mpe kana beno lenda sala yawu ve, na yina beno tuba na muntu mosi, to

beno bika bawu kukwenda na beno. Beno sala yawu mutindu Masonukwa ke tuba. Beno me mona? Kasi ve . . .

³⁷ Kana muntu mosi tuba, “Mpangi-kento *Kingandi*, to Mpangi *Kingandi*,” beno kwikila ve mpova mosi ya yawu. Beno bika kaka yawu kukwenda. Samu ti, beno bambuka moyo, ya kele dyabulu ke na kumeka na kubebisa beno na bitini-bitini. Ntangu yayi beno tala kaka yandi kukwiza, samu ti yandi ke sala yawu. Ntangu yayi beno bika muntu ya mbote ya yinzo, lukwikilu, kutelama kaka kuna, mpe beno yamba kima mosi ve. Bantu yayi me vwanda na bisika ya Mazulu na beno, ke bundana kintwadi pene-pene ya balusakumunu ya Nzambi, bakaka kominyo na mesa, mpe Mpeve-Santu me pesa kimbangi ti bawu kele bana ya Nzambi. Ti beto vwanda kaka kieleka mbote, ya ntima ya mbote, ke lemvokila, ke zola. Mpe kana muntu yankaka kuzonza yimbi ya beno, beno zonzila mbote ya bawu. Beno tala mutindu mbote ya ke kuma samu na beno kuna. Beno me mona? Ya kele kieleka. Beno vutula kaka mbote na yimbi, zola na kuyina. Mpe kaka . . .

³⁸ Nge ke na kuwa mbote, cherie, mwana-kento ya fyoti na manima? Ya kele mbote. Mu ke vutula matondo mingi. Inga. Mu vwanda kaka na manima . . . Yandi vwandaka ya kufutika na zole na manima kuna, mpe Mfumu Yesu me basisa yandi ntangu yayi mpe me talisa yandi na lukutakanu. Beto ke vutula matondo mingi samu na yawu. Ya kele samu na yina mu bikaka chaire, mwa ntangu fyoti me luta. Bawu tubaka ti bawu vwandaka “me sambila mpe me sambila, lendaka ve na kusimba Mfumu.”

³⁹ Ntangu yayi, beno ndima kieleka na kusala yawu. Beno sila yawu, na Nzambi. “Nzambi, na lemvo ya Nge, yawu yina mu ke sala.” Ata yina ntangu muntu mosi ke tuba yimbi; beno vutula mbote. Beno banza yimbi ve. Kana beno banza yimbi, mpe beno kele kaka luvunu na kutubaka yawu, na yina—na yina—na yina beno kele na kifu. Beno landila kaka na kukipesa beno mosi na Nzambi tii kuna beno ke kuwa mbote na muntu yina. Ya kele mutindu ya kusala yawu. Na yina lembami ya balusakumunu ya Nzambi ke vwanda kaka, oh, ya ke fuka kaka moyo ya beno. Ya kele mutindu ya kuzinga na lunungu, na yina kima mosi ve lenda sala beno mpasi ntangu nyonso yina beno kele na zola. Mbote, beno ke tuba . . . Beno me mona?

⁴⁰ “Kana beno kele na bandinga, ya ke suka. Mpe kana beno kele na ndwenga, ya ke zimbana. Baprofesi, ya ke kubwa. Kasi ntangu beno kele na zola, ya ke vwanda ntangu nyonso.” Beno me mona?

⁴¹ Mpe beno zola kaka ve bayina ke zolaka beno, kasi beno zola bayina ke zolaka beno ve. Samu ti, ya kele mpasi ve samu na munu na kuzola muntu nyonso yina zola munu, kasi beno meka na kuzola muntu yina ke zolaka beno ve. Ya kele kisika beno lenda meka kana beno kele Muklisto, to ve. Muntu yina ke zolaka beno ve, mpe dyaka, na kati ya ntima ya beno, beno zola bawu.

Ntangu yayi, kana beno sala yawu ve, na yina beno landila kaka na kukangama na Nzambi. Ya kele kuna, samu ti mu zaba ti ya kele Kieleka. Amen. Mu zaba ti ya kele Kieleka.

⁴² Ntangu yayi beto ke zibula Ndinga ya ntalu, ntangu yayi, na Buku ya ba-Hebreux, mpe kapu 11, kaka samu na Nsangu ya nkufi.

Na kuvwandaka na mwa ndinga ya kukangama, kasi mu kuzwaka manima mosi ya midi ya mbote na bampangi-babakala mpe bampangi-bakento. Mpe ata mbala mosi ve mu kotaka tii pene ya ngunga sambanu. Mpe mu kwendaka kaka na kivinga mpe mu fukamaka na lweka ya mbeto, na kivinga ya kulala, mpe mu sambilaka mwa ntangu fyoti. Mu telamaka, mpe bakaka Biblia ya munu mpe bandaka na kutanga. Mpe mu monaka magazine mosi ya kutandama kuna, mpe mu lokotaka yawu. Mpe ya vwandaka ya kusonika na Afrikaans, na yawu mu lendaka ve kutanga yawu.

⁴³ Mpe bantangu yankaka, na kutangaka, mpova mosi ke bula beno, mpe ndinga yango ke kuma ya moyo samu na beno. Ya kele mutindu longi ke kuzwaka ya yandi, nsangu ya yandi. Beno ke banda kaka na kutanga, kutanga Biblia, kima mosi. Kima ya ntete beno zaba, kima mosi ke bula beno, na manima kima mosi ke bwela na yawu kima, kima mosi ke bwela na yawu kima mosi. Na yina, beno tula kidimbu na yisi ya yawu, mpe beno kwenda kaka na chaire mpe beno tanga yawu. Nzambi ke sala yina yankaka. Beno me mona? Yandi ke baka nyonso yankaka.

⁴⁴ Ntangu yayi, bantangu yankaka beno ke kwenda ntama mingi, tii beno ke sala mwa mabanza ya yina, mwa banoti yina beno me banza. Bantangu yankaka na lukutakanu, kisika beno fwana kwiza na nswalu na estrade, ti, beno tanga kaka mwa mabanza yina beno kuzwaka, ti Mpeve-Santu ke pesa yawu luzingu samu na beno dyaka. Mu me salaka yawu bambala mingi.

⁴⁵ Ntangu yayi Hébreux 11, beto tanga nzila ya lte, na kubanda, mpe beto ke tanga mwa banzila.

Ntangu yayi lukwikilu kele kima ya bima yina beto ke salaka kivuvu, kimbangi ya bima yina ke monanaka ve.

Samu ti na yawu bakuluntu kuzwaka kimbangi ya mbote.

Na nzila ya lukwikilu beto ke bakula ti yinza kusalamaka na ndinga ya Nzambi, samu ti bima yina ke monanaka vwandaka ve ya kusala na bima yina ke monika.

⁴⁶ Ya kele ve mvwama? Beno bika mu tanga nzila yango ya 3 dyaka. Beno kuwa mbote:

Na nzila ya lukwikilu beto ke bakula ti yinza kusalamaka na ndinga ya Nzambi, samu ti bima yina

ke monanaka vwandaka ve ya kusala na bima yina ke monika. (Ya kele Ndinga ya Nzambi.)

Na lukwikilu Abel pesaka na Nzambi munkayulu ya kulutula na yina ya Cain, na yina yandi kuzwaka kimbangi ti yandi vwandaka ya kusungama, Nzambi pesaka kimbangi ya makabu ya yandi: mpe na nzila ya yawu . . . ke zonga dyaka ata ya kufwa.

Na lukwikilu ba zangulaka Enoch ti yandi zolaka mona ve lufwa mpe ba monaka yandi ve, samu ti Nzambi . . . zangulaka yandi: samu ti ntete luzangulu ya yandi, yandi kuzwaka kimbangi, ti yandi sepelisaka Nzambi. (Bankama tanu ya bamvula ya luzingu, mpe.)

Kasi kukondwa lukwikilu ya lenda salama ve na kusepelisa yandi: samu ti yandi yina ke kwiza na Nzambi fwana kwikila ti yandi kele, mpe ti yandi kele musendo ya bayina ke sosaka yandi.

Na nzila ya lukwikilu Noé, na kuvwandaka ya kukebisa na Nzambi ya bima yina ke monanaka ntete ve, tambulaka na boma, yidikaka sanduku samu na kuvulusa yinzo ya yandi; na . . . na yina yandi fundisaka yinza, mpe kumaka kibyadi ya . . . ludedomo yina kele na nzila—yina kele na nzila ya lukwikilu.

⁴⁷ Ntangu yayi beto sambila kaka mwa ntangu fyoti, mpe beto kulumusa bayintu ya beto.

⁴⁸ Mfumu, Nzambi ya beto ya Kulutula Lemvo mpe Tata, beto me kwiza dyaka na Mvwandulu ya Nge, na kuvutula matondo. Mpe ve kaka ntangu yayi ti beto ke na kuwa ti beto kele na Mvwandulu ya Nge samu ti beto me kulumusa bayintu ya beto samu na kusambila, kasi beto ke kwikila ti beto ntangu nyonso kele na kati ya Mvwandulu ya Nge, samu, ti, “Meso ya Mfumu ke tambulaka ntoto nyonso.” Mpe Nge zaba bima nyonso, mpe Nge zaba mabanza ya ntima.

⁴⁹ Na yawu, Mfumu, dyambu beto ke kulumusa bayintu ya beto, kele na kulomba ndombolo yayi, ti Nge ke lemvokila beto samu na bayimbi ya beto nyonso mpe bayimbi ya beto nyonso na kuteleminaka Nge, mpe ti kyadi ya Nge mbala mosi dyaka ke pesama na beto, na mutindu ti Nge ke zibula bikoba ya beto samu na kuzonza, mpe makutu ya beto na kuwa, mpe ti Ndinga ya Nge lendaka kuma kieleka samu na beto, na nkokila yayi; ti mwa banzila yayi yina beto me soola samu na kutanga lendaka kuma lusalusu ya nene samu na konso mambele ya Nzutu ya Nge ya misitiki na zulu ya ntoto, Dibundu ya Nge ya kimpeve, Dibundu ya Mwana ya ntete, Dibundu yina ba sumbaka na Menga ya Yesu, yina ba me sukula mpe ba me santisama, mpe yina ba ke monisa na Nzambi Kilumbu yina, kukondwa kifu to mifutu. Mutindu beto ke tonda Nge, samu na kuvwanda na lukwikilu ya kukwikila ti beto kele bantu kele na kitini na

bumbote ya Nzambi yayi, na nzila ya ludedomo mpe kyadi ya Mfumu ya beto Yesu!

⁵⁰ Mu ke sambila ntangu yayi ti Nge ke belusa bimbevo nyonso. Mu ke vutula matondo na Nge na yina Nge vwanda me simba mwana-kento yina ya fyoti na mwa ntangu fyoti me luta, yina vwanda baluka na kati ya kivinga kuna, na mpasi; kumona yandi kubasika, mwa lukwikilu yina ya bumwana, mpe kundima Nge mpe kyadi ya Nge. Mpe beto ke tonda Nge samu na yayi; mpe beto ke sambila ti Nge ke bambuka moyo na mwa bantu yina ya luzolo ya Mpangi-kento Baker kuna na Kentucky, mpe bayina Mpangi Neville wandaka me zonzila, mpe, O Nzambi, na camp ya kufuluka na bambevo, bisika nyonso. Mpe mingi-mingi, Mfumu, bayina me vuluka ve mpe me zaba Nge ve; kana bawu lendaka kufwa na masumu ya bawu, bawu lendaka kwiza ve kisika Nge kele.

⁵¹ Beto ke sambila ti Nge ke pesa beto kimbangi mpe ngolo, na kikesa samu na kuzonza Ndinga, mpe ndwenga na kuzaba ntangu ya kuzonza Yawu. Mpe na yina zonga na beto ntangu beto me tuba mingi, ti beto lendaka kwenda mpe kubika bantu na kati ya kuyituka, kukiufula, na Mpeve-Santu ya nene mpe kisalu ya Yandi. Pesa yawu, Mfumu. Kuwa beto ntangu yayi, beto ke sambila, na Nkumbu ya Yesu beto me lombwa yawu. Amen.

⁵² Mu ke zola kuzonza kaka mwa ntangu fyoti na zulu ya dilongi “ba-sens.” Ba me longaka beto ti muntu ya yinza kele na ba-sens tanu. Mpe ba-sens yango tanu ke yalaka ya yandi—ya yandi . . . To ke pesa . . . Nzambi pesaka yandi ba-sens tanu yayi, samu na kukutana na yinzo ya yandi ya ntoto. Mpe ba-sens yango me zabana mutindu: kumona, ntomo, kusimba, kuwa nsunga, kuwa. Ba-sens yina tanu, yina me zabana na muntu ya yinza, mpe yawu kele mbote. Mpe beto lenda sala ve, to kuzinga luzingu ya kulunga, ntangu mosi ya ba-sens yayi ke lembana na kusala. Kumona ya beno, kuwa, kusimba, kuwa nsunga, to kumeka, beto lenda vwanda ve ya kulunga kukondwa yawu. Ya kele na kima ke kondwa, kitini mosi ya luzingu yina beto lenda ve kukutana, kukondwa sens yina kusala. Mpe yawu kele mbote. Mpe yawu kele na mfunu. Mpe ba pesaka yawu na beto na Nzambi.

⁵³ Nzambi pesaka ba-sens yina, kasi ba pesaka yawu na beno mutindu dikabu. Mpe ya ke tala mutindu beno, yina beno ke pesa ba-sens yayi, ke vwanda mutindu yina luzingu ya beno me twadisama, mutindu beno ke pesa ba-sens yina tanu. Benoit kele. . . Yina beno ke mona, yina beno ke kuwa, yina beno ke meka, kuwa nsunga, to kuwa. Na nyonso yina ba-sens yango kele ya kupesama, yawu ke yala beno.

⁵⁴ Mpe beto ke vutula matondo na Nzambi ti beto kele na ba-sens tanu. Kasi na ata fyoti ve ba-sens yayi tanu kupesamaka, na beno, samu na kutwadisa beno. Ba pesaka yawu na beno samu na kukota na kiwisa na ntoto. Kasi ba pesaka beno sens

ya sambanu, mpe, sens yina ya sambanu, kele kaka ya Muklisto. Mpe beno lenda ve kuzwa sens yayi ya sambanu tii kuna beno ke kuma Muklisto; ya kele kaka mutindu yina beno lenda kuzwa ya kulutula ba-sens tanu ya kimuntu samu na muntu ya yinza. Kasi, sens ya sambanu kele mbote ya kuzabana, na Muklisto, mutindu lukwikilu. Ya kele yina ke yalaka mpe ke twadisaka beno, mpe ya kele ya kulutula zulu na ba-sens nyonso yankaka. Ya kele ya kulutula zulu na ba-sens nyonso, yankaka, ba-sens tanu.

55 Ntangu yayi, mu ke zola ve kutuba ti samu ti beto kuzwaka sens ya sambanu ti ba-sens tanu kele dyaka mbote ve. Yinga, ya kele. Ba-sens yango tanu kupesamaka na beno na Nzambi, mpe ya kele ya kusadila. Kasi ntangu ba-sens tanu ke sala ya kuswaswana na Ndinga ya Nzambi, na yina ya ke na kuvuna.

56 Ntangu yayi, sens ya sambanu lenda vuna ve. Ya kele sens ya kulutula. Mpe ya kele yina mu zola kuzonzila. Na suka yayi mu vwanda me zonzila na: *Kidimbu ya Kulutula*. Mpe na nkokila yayi na zulu ya: *Sense Ya Kulutula*.

57 Mpe sens ya kulutula kele Mpeve-Santu, lukwikilu ya Nzambi yina ke zingaka na kati ya beno. Mpe kana beno bika ba-sens tanu kupesama na sens ya sambanu, ya ke twadisa beno mpe ke nata ba-sens nyonso yankaka na yisi ya luyalu ya sens yina ya kulutula. Samu ti ya kele ntama mingi na zulu ya sens ya kimuntu, mutindu muntu ya kimpeve kele na zulu ya yinza. Ya kele ntama, mutindu mazulu kele, na zulu ya muntu ya yinza mpe ba-sens ya yandi tanu. Ya ke sala beno kukwikila bima yina beno lenda mona ve. Ya ke sala beno kusala kisika beno ke banza ve ti ba-sens tanu lendaka kaka kubanza na yawu. Diabulu lenda kota na ba-sens yayi tanu mpe kuvuna beno, kasi yandi lenda simba ve sens yina ya kulutula. Yina kele ntama mingi na diboko ya yandi. Yina ke katuka na Nzambi. Ba me bokila yawu lukwikilu. Lukwikilu kele kima yina ya nene.

58 Mpe ba-sens tanu ke yalaka ve sens ya sambanu, kasi sens ya sambanu ke yalaka ba-sens tanu. Sens ya kulutula ke yalaka ba-sens ya yinza. Mpe ba-sens tanu kele kumona, kumeka, kusimba, kuwa nsunga, kuwa. Mpe sens ya kulutula kele kima yina ke sala ti beno kwikila Ndinga ya Nzambi, samu ti ya kele kaka kima yina ya ke zonzila. Ya ke sala ti beno kwikila bima yina beno lenda mona ve, kumeka, kusimba, kuwa nsunga, to kuwa, samu ti ya ke baka Ndinga ya Nzambi. Mpe ya ke pesa Ndinga yina na beno, mpe ke sala beno kutambula ya kuswaswana na kima yankaka nyonso kasi Ndinga ya Nzambi, na nzila ya lukwikilu. Lukwikilu ke salaka yawu.

59 Ntangu yayi, na kupesaka kifwanukusu yayi, ya ba-sens, muntu ya yinza me butuka na ba-sens yayi, na yawu ya kele ba-sens yina ba me pesa na yinza. Mpe ya kele kaka kima yina yandi ke zaba na yawu, na dibanza ya yandi ya mayela. Yandi lenda banza kaka mutindu muntu. Yandi lenda mona mutindu

muntu. Yandi lenda bakula mutindu muntu. Yandi lenda kuwa mutindu muntu. Kasi ntangu yandi ke kuma na yisi ya lutumu, to ke vutuka dyaka, to beto ke bokila yawu “kubutuka mbala zole,” kuna sens yina ya sambanu, ya kulutila ke simba yandi. Na kusalaka mutindu yina, sens yina ya kulutila ke telemisa yandi na kisika yina yandi kele na lukwikilu samu na kukwikila bima yina yandi lendaka kuwa ve, bima yina yandi lendaka ve kumona, kubakula yina yandi lendaka ve kubakula. Yandi ke kwikila yawu, na mutindu nyonso, samu ti yandi me twadisama na sens yina ya sambanu, sens yina ya kulutila. Oh, mutindu ya ke yitukisa na kuzaba yawu, mpe kubanza mutindu pete-pete ya kele na kukwikila yawu!

⁶⁰ Ntangu yayi, beno lenda kwikila yawu ve tii kuna beno ke vutuka ya malu-malu. Biblia ke tuba ti, “Muntu ve lenda bokila Yesu Klisto, kana kaka na nzila ya Mpeve-Santu.” Beto talaka yawu, sabala yayi me luta. Mpe ya vwandaka ditadi mosi ya disakuba, mingi-mingi samu na bantu ya Pentecote yina ke kwikilaka, ntangu bawu kuwaka munu kutuba yawu. Yesu tubaka, na Santu Jean 5:24, “Yandi yina ke kuwa Ndinga ya Munu, mpe ke kwikila na Yandi yina fidisaka Munu, kele na Luzingu ya Kukonda nsuka.” Luzingu ya Kukonda nsuka ke katukaka na Nzambi, kaka. “Mpe muntu mosi ve lenda tuba Yesu kele Klisto, kana kaka na nzila ya Mpeve-Santu.”

⁶¹ Beno ke na kubakaka kaka yina muntu yankaka tubaka, yina beno longukaka na nzila ya mayela, yina beno longukaka na nzila ya yinza, ba-sens tanu. Kasi ntangu sens ya sambanu ke kota, Mpeve-Santu, Ya ke katula mabanza nyonso ya ba-sens yayi sambanu mpe. . . ba-sens tanu. Mpe ke zangula beno na kati ya sens yina ya sambanu, samu na kusala ti beno kwikila bima yina beno lenda mona ve, kumeka, kusimba, kuwa nsunga, to kuwa. Ya ke sala kima mosi na beno! Na yina beno lenda tuba ti Yesu kele Klisto, samu ti beno vwanda mhangi ya yawu. Ve yina malongi ya lukolo me longa beno, kasi yina beno me kuzwa kimbangi!

⁶² “Yinki sens ya sambanu ke sala kuna, Mpangi Branham? Samu na yinki sens ya sambanu ke kwiza?”

⁶³ Sens ya sambanu ke kwiza samu na kikuma yayi. Ntangu yayi, sense ya sambanu kele lukwikilu, sens ya kulutila. Ntangu yayi kana. . . Sens ya sambanu ke kwiza samu na kikuma yayi kaka, yina vwandaka, samu na kusala ba-sens tanu na kati ya beno kumanga kima yina kele ya kuswaswana na Ndinga ya Nzambi. Ya kele samu na yina sens ya sambanu kele. Masonukwa ke zonzila na “kulosa mabanza.”

⁶⁴ Ba-sens tanu ke sala, beno lenda banza, “Mbote, ntangu yayi, samu na yinki muntu yayi. . . Yandi, samu na yinki. . . ?”

⁶⁵ Kasi sens ya sambanu ke monaka yawu ata fyoti ve. Ya kele mingi ntama na zulu ya yawu! Ya kele zulu mingi kulutila yina

ya kele, tii ya ke vwanda dyaka ve na mabanza mosi, ata fyoti, na yawu. “Beto ke kwikila yawu.” Ya kele ntama na zulu ya nyonso yina ba-sens tanu fwana tuba samu na yawu. Ntangu yayi beno kubama samu na lukutakanu ya kubeluka ya nzutu. Beno me mona? “Beto ke kwikila yawu.” Beno ke tambula na nzila ya sens yina ya sambanu. Beno ke zonzila na nzila ya sens yina ya sambanu. Beno ke zingaka na nzila ya sens yina ya sambanu. Beno ke kufwa na nzila ya sens yina ya sambanu, mpe beno ke vumbuka na nzila ya sens yina ya sambanu. Sens yina ya kulutula, kima yina kele na kati ya beno, yina kele ya kuswaswana na yina muntu ya yinza kele.

⁶⁶ Muntu ya yinza kele kaka na yayi, mpe yawu kele nyonso kieleka kana yawu lenda natama na kutumama na sens ya sambanu. Kana mabanza ya yinza tuba, na kutanga Ndinga ya Nzambi, mpe kutuba, “Yina kele Ndinga ya Nzambi,” ya ke na kutuba Kieleka. Kasi kana ya tanga, mpe tuba, “Ya kele ve Ndinga ya Nzambi nyonso.” To—to, “Ya *vwandaka* kima mosi. Ya *vwandaka*, kilumbu mosi, kasi Yawu kele ve ntangu yayi.” Na yina sens yina ya sambanu ke kota, mpe ke tuba, “Yandi kele mutindu mosi mazono, bubu yayi, mpe kukonda nsuka.” Beno me mona, yina kele luswaswanu.

⁶⁷ Ya kele samu na yina ti bantu mingi ke lembanaka na kubeluka. Ba ke meka na kukwiza na dibanza ya lukolo. Ba ke tuba, “Oh, mu—mu ke sala *yayi*, to mu ke kwikila *yayi*, mpe nyonso yina.”

⁶⁸ Kasi kana sens yina ya sambanu ke na kutuba yawu, na yina ya kele ve na kima mosi ke ningisa bawu na sens yina ya sambanu. Sens ya sambanu ke kwiza, na zulu ya muntu, samu na kusala ti bawu kumanga kima yina me swaswana na Ndinga ya Nzambi. Bidimbu nyonso yina ke talana, nyonso ya bidimbu yina ke talana yina me swaswana na nsilulu ya Nzambi, sens ya sambanu ke tuba ti yawu kele kuna ve, kana Muklisto yina me butuka mbala zole.

⁶⁹ Mpe kima ya ntete beno zaba, mumpani mosi, muntu ke kwikilaka ve ke belama na Muklisto, mpe ke tubaka, “Ntangu yayi tala awa, ya kele ve na kima mutindu Mpeve-Santu yina. Nge me zimbana kaka, na kati ya yina. Nge kele kilawu, kana nge ke kwikila kima ya mutindu Yina. Ya kele ve na kima mutindu Yawu.”

Sens yina ya sambanu ke kwenda mbala mosi na kisasu.

⁷⁰ “Beni bika mu lakisa beno, na kati ya Biblia, kisika beno lenda ve kuzwa Mpeve-Santu. Beno me mona, mu lenda lakisa awa kisika bilandi kuzwaka Yawu, kasi—kasi mu . . .”

⁷¹ “Mbote,” beno ke tuba, “tala,” mpe sens ya sambanu ke lakisa beno, na kutuba, “kasi Yandi tubaka, ‘Nsilulu kele samu na beno, samu na bana ya beno.’”

⁷² “Mbote, yina zolaka kutuba bana *ya bawu* kuna. Yina zolaka kutuba ve samu na beno. Ya kele ve samu na beno.”

⁷³ Kasi sens yina ya sambanu zaba mbote. Samu na yinki? Ya kele yimeni na kati ya beno. Ba me tuba yawu na manima ya ntangu me luta mingi. Beno me kuzwaka Yawu yimeni.

⁷⁴ Bantu yina ke zonzaka, ti, “Ya kele ve na kima mutindu Mpeve-Santu,” zaba ve yina bawu ke na kuzonzila.

⁷⁵ Mutindu mwana ya bakala yina, kilumbu yina, yina vwandaka katula bampusu na pomme. Mpe mumpani yufulaka, vwanda swanisa samu na lukutakanu. Yandi tubaka, “Yinki nge zola? Yinki nge ke zolaka na zulu awa?”

⁷⁶ Yandi tubaka, “Mu zola kuyufula nge kyuvu mosi,” na yina yandi vwandaka kudya pomme mpe vwanda sepela na yawu. Ya vwandaka kieleka muntu ya mpamba, yina vwandaka talana mutindu kipumbulu, na nsuki ya kulelika na kizizi ya yandi, mpe dinu mosi na ngaanda, na ntwala, mpe ya kulwata blouson mosi ya ntama ya mvindu. Yandi tubaka, “Kaka kyuvu mosi mu zola kuyufula nge.”

⁷⁷ Mumpani vwandaka tuba kaka, “Ya kele ve na kima mutindu Nzambi. Ya kele nyonso kuningana ya nzutu. Ya kele na buzoba na yawu, ya kele nyonso yina ya kele.”

⁷⁸ Mpe mwana ya bakala yango tubaka, “Mu zola yufula nge kyuvu mosi, tata. Pomme yayi kele kitoko to ngani?”

Yandi tubaka, “Wapi mutindu mu ke zaba? Mu ke na kudyaka yawu ve.”

Yandi tubaka, “Ya kele kaka yina mu vwandaka banza,” yandi vutukaka kaka na manima.

⁷⁹ Wapi mutindu beno ke zaba, ntangu beno me meka Mfumu ve? Wapi mutindu beno ke zaba, ntangu beno me kuzwaka ntete ve Mpeve-Santu, kana Yandi kele kieleka to kana Yandi kele ve? Wapi mutindu beno ke zaba kisika ya kele na lukwikilu mpe ngolo? Wapi mutindu beno ke zaba ti ya kele ve na “kyese yina ba lenda zonzila ve mpe ya kufuluka na nkembo,” na ntangu beno me mekaka ntete ve, samu na kumona yawu? Sens ya sambanu ke twadisa beno na Yawu. Sens ya sambanu ke tuba Yawu na beno.

⁸⁰ Ya kele ve na bangolo ya mayela, ata fyoti, yina ke nata Yawu na beno. Bangolo ya mayela ke banza, mpe kutuba, “Kasi, ya kele psychologie. Ya kele kima mutindu *yayi*. Mpe ya kele kuningana ya nzutu, na bantu.”

⁸¹ Kasi ntangu sens ya sambanu ke kota, ya ke manga bima yina nyonso, mpe ke kotisa muntu mbala mosi na ntulu ya Nzambi. “Yandi yina ke kwiza na Nzambi fwana kwikila ti Yandi kele, mpe ke yina ke pesaka musendo na bayina ke sosaka Yandi.” Na lukwikilu! Na lukwikilu, Abraham! Na lukwikilu, Isaac! Na lukwikilu, Jacob! Bawu nyonso na lukwikilu! Ya kele sens

ya sambanu yina ke salaka yawu. Sens ya sambanu ke manga bidimbu nyonso, bidimbu nyonso ya kimbevo, kima nyonso ya kuswaswana na Ndinga ya Nzambi, nsatu nyonso, kuningana ya nzutu.

⁸² Muntu mosi ke tuba, “Oh, mbote, ba sambilaka munu, kasi mu ke na kuwa ya kulutula mbote ve.”

⁸³ Sens ya sambanu ke vwanda ata mbala mosi ve swi samu na yawu. Sens ya sambanu ke tuba, “Ya kele luvunu. Mu ke kuwa mbote. Mu ke na kuwa mbote. Nzambi tubaka mutindu yina, yina ke sukisa dyambu. Amen. Nzambi tubaka mutindu yina.” Sens ya sambanu ke kudyaka kaka Ndinga ya Nzambi.

⁸⁴ Sens yina ya kulutula, ya kele ya kulutula, na zulu ya ba-sens. Ya kele sens ya kulutula nene. Ya kele lukwikilu. Ya kele ngolo yina ke ningisaka mpe ke twadisaka. Amen. Ya kele kima yina ke sala beno kusala bima yina beno banzaka ata mbala mosi ve ti beno ke sala. Ya kele sens ya sambanu, sens ya kulutula.

⁸⁵ Ba sambilaka nge. Beto tuba ti nge vwandaka—vwandaka na diboko ya kikata mpe ba sambilaka nge, diboko ya nge, nge mataka kuna mpe nge kwikilaka ti Nzambi ke belusa nge. Pasteur me sambila samu na nge, nge me vutuka. Muntu ya ntama ya yinza ke tuba mutindu yayi, “Nge ke na kuwa ata luswaswanu ve na diboko yina. Nge kele ve mbote kulutula yina nge vwandaka ntete.” Kasi sens ya sambanu ke kwiza, mpe ke tuba, “Yina kele luvunu. Ba me sambila nge. Yina ke sukisa dyambu.” Amen.

⁸⁶ Mutindu kento yina kwizaka na lukutakanu ya beto kilumbu mosi. Mpe bawu kwizaka na lukutakanu ya beto, bawu zole. Bawu sabukaka estrade. Bawu monaka kuswasikisa mabanza. Bakento yango vwandaka kaka—kaka ya kukonda. Bawu zole vwandaka Baklisto ya kieleka. Mosi kwizaka, mpe Mpeve kwizaka mpe tubaka, “Nge ke na mpasi na estomac.”

Mpe kizizi ya yandi kulezimaka. Yandi tubaka, “Ya kele kieleka.”

⁸⁷ Mpe Mpeve-Santu tubaka na nzila ya munu, tubaka, “Mpe ya kele mputa. Ya me katuka na kimbevo ya kidi-kidi. Ba me tala nge na dokotolo mosi. Mpe yandi tubaka ti nge lendaka ve. . . Nge fwana sala yawu, oh, nge fwana sala lipaso, ba fwana katula yawu.”

Yandi tubaka, “Konso ndinga ya yawu kele kieleka.”

⁸⁸ Mpe na yina, na kumonaka ti yandi vwandaka mukwikidi ya nene, na yina Yawu tubaka, “Nkumbu ya nge kele Mademoiselle *Kingandi*. Nge me katuka na *yayi-mpe-yayi*, mpe na kisika *yayi-mpe-yayi*.”

Yandi tubaka, “Ya kele kieleka.”

⁸⁹ Yinki ya vwandaka? Sens ya sambanu vwandaka simba yawu. Sens ya sambanu mpe Mpeve-Santu vwandaka ya

kutelama lweka na lweka. Mpeve-Santu vwandaka zonza, sens ya sambanu vwandaka tuba “amen.” Yawu yina. Kima mosi fwana salama.

⁹⁰ Ntangu Marthe kwendaka mbangu samu na kutala Yesu, mpe ntangu yandi tubaka, “Mfumu!” Beno tala mbote sens ya sambanu. “Kana Nge vwandaka awa, mpangi ya munu ya bakala zolaka kufwa ve, kasi ata mpe ntangu yayi, nyonso yina Nge ke lomba na Nzambi, Nzambi ke pesa yawu na Nge.” Beno tala sens ya sambanu.

⁹¹ Yesu bendamaka Yandi mosi, tubaka, “Mu kele mvumbukulu mpe Luzingu. Yandi yina ke kwikila na Munu, ata ti yandi me kufwa, kasi yandi ke zinga. Yina nyonso ke zinga mpe ke kwikila na Munu ke kufwa ata fyoti ve. Nge ke kwikila yawu?”

⁹² Yinki beno ke tuba, kubanza? Ya kele na muntu mosi ya kulala kuna, ya kufwa, mpe misobi ke tambula na kati ya yandi.

⁹³ Kasi Yandi me tuba kaka ti Yandi vwandaka mvumbukulu mpe Luzingu. Yina kele Ndinga ya Nzambi. Sens yina ya sambanu, na zulu ya bankisi ya dokotolo, na zulu ya mabanza ya kutala ya science. Ke telemina nyonso. Ke telemina mabanza nyonso, mpe ke losa yawu. Samu na yinki? Ya ke pesa kimbangi na Ndinga ya Nzambi. “MU KELE. Mu kele ve ‘Mu ke vwanda, Mu vwandaka.’ MU KELE ntangu yayi. Mu kele mvumbukulu mpe Luzingu,” Muntu. “Yandi yina ke kwikila na Munu, ata ti yandi me kufwa, kasi yandi ke zinga. Mpe muntu yina nyonso ke zinga mpe ke kwikila na Munu ke kufwa ata fyoti ve. Nge me kwikila yawu?”

⁹⁴ Yandi tubaka, “Yinga, Mfumu,” sens ya sambanu, “Mu ke kwikila ti Nge kele Mwana ya Nzambi yina ke kota na yinza.”

“Mpangi ya nge ya bakala ke vumbuka dyaka.” Oh, la la!

⁹⁵ Na ntoni bawu kwendaka. Bawu zole, kintwadi, kima mosi zolaka salama. Yina vwandaka sens ya kulutila, na Nzambi ya kutelama kuna, kima mosi zolaka salama. Sens yina vwandaka sens ya kulutila, vwandaka Nzambi. Kima mosi vwandaka tuba yawu na Marthe. Yandi monaka Yandi. Yandi zabaka Yandi. Yandi zabaka ti Yandi vwandaka Mesiya ya kieleka. Mpe yandi zabaka, kana yandi lendaka kaka kukuma na Yandi, kana yandi lendaka kaka kubelama na Yandi mpe kutalisa dyambu yango, kuwa kaka nsilulu mosi kukatuka na Yandi. Yawu yina kaka yandi vwandaka zola. Ntangu Yandi tubaka, “Mu kele mvumbukulu mpe Luzingu! Yandi yina ke kwikila na Munu, ata ti yandi me kufwa,” ya kele yina nyonso Marthe zolaka kuwa, nyonso yandi zolaka. Samu ti, sens ya sambanu, sens ya kulutila, lukwikilu ya yandi, vwandaka ningisa yandi samu na kufunguna Yandi, na kukwikila Yandi.

⁹⁶ Kento yayi, ntangu yandi bikaka estrade, ya vwandaka MUTINDU ME TUBA MFUMU. “Vutuka na yinzo mpe kudya. Yesu Klisto me belusa nge.” Yandi vutukaka na yinzo.

⁹⁷ Na nkokila yina, nkundi ya yandi, yina ke vwandaka na quartier, yina ke vwandaka na bala-bala ya tatu to yiya na manima ya yandi. Mpe yandi vwandaka na kivimbu ya nene na nkingu ya yandi. Mpe yandi yayi ke na kwiza, na kyese nyonso samu na yayi, mfinangani ya yandi zolaka beluka na mputa yina vwandaka kwamisa yandi mingi. Yayi vwandaka mosi ya bankama ya bamambu, mafunda ya yawu. Mpe kivimbu yayi ya nene vwandaka basika na nkingu ya yandi, mpe yandi kwizaka. Mu tubaka, “Muntu mosi ve lendaka swasikisa yawu, kasi nge kele na kyese samu na kima mosi. Nge vwandaka na kyese, samu kento yina me vwanda kuna na zulu kele mfinangani ya nge.” Mpeve-Santu!

⁹⁸ Yandi banzaka, “Wapi mutindu na yinza bakala yina lendaka zaba yawu? Ya fwana vwanda Kima mosi samu na kumonisa yawu na yandi.”

⁹⁹ Na yawu ntangu yina tubamaka, Ya tubaka, “Nge ke banza na nkingu ya nge.”

“Yinga.”

“Nge ke kwikila ti ya ke kwenda?”

“Mu ke kwikila yawu,” yandi tubaka, “na ntima ya munu ya muvimba.”

¹⁰⁰ Mu tubaka, “MUTINDU ME TUBA MFUMU. Vutuka na yinzo mpe nge ke kuzwa kubeluka ya nge.”

¹⁰¹ Muntu ya yinza talaka pene-pene mpe lendaka ve kumona kidimbu. Kento yina na mputa vutukaka na yinzo mpe mekaka na kudya, mpe, oh, yandi zolaka kufwa. Oh, muntu ya yinza, kuwa ya sens ya yinza vwanda tuba dyaka ti mputa kele kuna.

¹⁰² Na yawu na manima ya lumingu mosi to zole lutaka, yandi kwendaka na quartier nyonso, na bantu ya yandi nyonso ya dibuundu, na kupesaka kimbangi, “Mfumu me belusa munu.”

Mpe bawu tubaka, “Nge ke na kudya ntangu yayi?”

¹⁰³ “Ve, kieleka nyonso ve yina mu zola. Kasi,” yandi tubaka, “Mu me beluka yimeni, samu ti na bamputa ya Yandi mu me beluka.” Ata nyonso yina ya vwandaka, yandi belukaka, na mutindu nyonso.

¹⁰⁴ Mpe na suka mosi, bana kwendaka na lukolo, mpe yandi kuzwaka nzala ya kieleka. Yandi vwandaka ya kutelama, vwandaka sukula badonga, na nela. Yandi kwizaka na lukutakanu, lukutakanu yankaka pene ya mvula mosi na ntuala. Mpe yandi vwandaka sukula badonga, mpe ntangu yandi, kima ya ntete, yandi kuwaka nsatu mosi ya ngitukulu kuluta na zulu ya yandi. Mpe yandi banzaka, “Yinki ya vwandaka? Mu kuwaka mutindu mu zolaka boka.”

¹⁰⁵ Mpe bakala ya yandi tubaka na yandi, yandi tubaka, “Cherie, nge sukisa na kuzonzila kubeluka yina,” yandi tubaka,

“samu ti,” ata ti yandi vwandaka Muklisto, yandi tubaka, “nge ke na kunataka nsoni na zulu ya Dyambu.”

¹⁰⁶ Wapi mutindu beno lenda nata nsoni ntangu beno ke na kupesa kimbangi na Ndinga ya Yandi? Beno ke nata nsoni kana beno pesa ve kimbangi na Yawu.

Yandi tubaka, “Kana nge belukaka, nge belukaka.”

¹⁰⁷ Yandi tubaka, “Bakala yina telemaka mpe talaka munu na meso, mpe tubaka na munu mambu ya munu mpe bima yina mu salaka, mpe nani mu vwandaka, mpe kisika mu katukaka.” Yandi tubaka, “Mu vwandaka ve na kati ya kivinga baminuti kumi na tanu, ntangu yandi kwizaka na estrade. Wapi mutindu na yinza muntu yayi lendaka zaba yawu? Mu me monaka yandi ata fyoti ve na luzingu ya munu. Mpe yandi tubaka na munu, ‘MUTINDU ME TUBA MFUMU. Nge me beluka.’” Mpe yandi tubaka, “Mu ke kwikila yawu tii mu ke kufwa.” Yandi tubaka, “Mu ke kwikila yawu, na mutindu nyonso.” Na yawu, yandi, mpe mpangi ya yandi ya kento na yisi ya yandi, nkundi, vwandaka na ngwisani na Nzambi, ti bawu ke simba lukwikilu yina.

¹⁰⁸ Na suka yina, yandi waka kieleka mutindu yankaka. Mpe, na mwa ntangu fyoti, yandi kumaka na nzala. Kuna bana bikaka mwa ba-flocon d’avoine na ndonga, na mwa ndonga; mpe yandi tubaka ti flocon d’avoine ntangu nyonso ke yoka yandi na kati. Kana muntu me vwandaka ntete na mputa na kifundu, beno zaba yinki ya kele. Na yawu yandi nataka diboko mpe bakaka mwa baluto zole ya ba-flocon d’avoine yango. “Oh, la la,” yandi tubaka, “Mu fwana futa samu na yawu, mu banza, kasi mosi ya bilumbu yayi mu ke vwanda mbote mingi.” Kasi yandi talaka ti yandi vwandaka kaka na nzala, na yina yandi manisaka kaka ndonga yango. Yandi vingilaka mwa baminuti, na kumona yinki ke salama. Kima ve kusalamaka; yandi kuwaka mbote, vwandaka dyaka na nzala. Yandi kalingaka mwa bameki ya yandi, mpe salaka kopa ya kafe, mpe bakaka mwa mampa ya kuyoka, mpe yandi kuzwaka jubilé ya kieleka. Yandi kudyaka kaka nyonso yina yandi lendaka kudya. Yandi landilaka, na kusukula bandonga. Mpe pene-pene ya ngunga mosi na ntwala, yandi vwandaka dyaka na nzala. Yandi vwandaka dyaka ve na kimbevo.

¹⁰⁹ Yandi lwataka mwa yimpu ya yandi, mpe na bala-bala yandi kwendaka, na yinzo ya mfinangani yayi. Mpe ntangu yandi kumaka kuna, yandi kuwaka, yandi banzaka ti ya vwandaka na lufwa na kutala na dibuta. Ba vwandaka boka, mpe vwandaka loka, mpe vwandaka tambula bisika nyonso. Kento yango lalaka na nsukinina na suka yina, mpe vumbukaka, yandi talaka kuvimba yina vwandaka na nkingu ya yandi, mpe yawu zimbanaka na mpimpa. Yinki yawu vwandaka? Nzambi na kisalu.

¹¹⁰ Awa na Cadle Tabernacle, ntangu beto kuzwaka lukutakanu yina. Mwana-bakala yina ya kikata yina kotaka kuna, ba sambilaka yandi. Mingi ya beno vwandaka kuna samu na kumona yandi. Ba nataka yandi na kivinga yina ya nswalu-nswalu. Billy nataka munu na yandi. Ba tulaka yandi na estrade bampimpa tatu to yiya, to na . . . na kivinga. Yandi kuzwaka ve kalati ya bisambu, na yina ba tulaka yandi na kivinga ya nswalu-nswalu. Mu kwendaka kuna mpe sambilaka samu na yandi. Na kutalaka yandi. Yandi tubaka, “Tata Branham, nge lenda tuba na munu mwa kima ke bomba?”

Mu tubaka, “Yinga, tata, mwana. Polio kele yina me nata nge na kuvwanda mutindu yayi.”

Yandi tubaka, “Ya kele kieleka.”

¹¹¹ Mu tubaka, “Nkumbu ya nge kele *yayi-mpe-yayi*. Nge me katuka kisika yayi.”

“Ya kele kieleka,” yandi tubaka. Yandi tubaka, “Yinki samu na kubeluka ya munu?”

Mu tubaka, “Na bamputa ya Yandi nge me beluka.”

¹¹² Yandi vutukaka na yinzo, na kupesaka kimbangi, na kupesaka lukumu na Nzambi. Mpe ba vwanda tuba, ti yandi vwanda nata nsoni, na quartier, tii Lumingu mosi nkonga mosi ya milongi kotaka mpe belamaka na yandi, mpe tubaka, “Nge fwana sukisa na kusala yawu. Nge ke na kunataka nsoni na zulu ya Dyambu.”

¹¹³ Mpe ntwenya ya bakala yina vwandaka kuna, tubaka, “Tata, kana beno vwandaka ya kuvwanda kisika mu kele, kana beno vwandaka na kiti yina mu me vwanda, beno zolaka meka ve na kubotula munu kivuvu ya nsuka yina kele na munu, na Klisto.” Yandi tubaka, “Na bamputa ya Yandi mu me beluka.” Mpe yandi na kutubaka kaka yina . . . Ya kuvwanda kuna, makulu ya kikata, maboko, nzutu, mukongo. Mpe yandi tubaka kaka yina, mpe yandi me telama na kiti, ke na kukembila Nzambi.

¹¹⁴ Yinki? ba-sens ya yandi ya kimuntu tubaka ti yandi ke vwanda kuna; dokotolo tubaka ti yandi ke vwanda kuna ntangu nyonso, to ntangu nyonso yina yandi ke zinga. Kasi sens ya sambanu tubaka, “Na bamputa ya Yandi mu me beluka.” Mpe yandi vwandaka ve na kima ya kusala . . . Ya kele kukatula nyonso ya kuswaswana na yina Nzambi tubaka. Ya kele samu na yina sens ya sambanu kele.

¹¹⁵ Kiboba John Rhyn, ve R-y-a-n, kasi R-h-y-n. Yina vwandaka mulombi ya mpofo na Fort Wayne, kuna sika wapi beto kwendaka kilumbu yina mpe ba sambilaka yandi na lukutakanu. Ya vwandaka nkokila yina na ntwala piano kubula, “Munganga ya nene kele awa ntangu yayi,” kukondwa muntu. Mpe ntangu yandi vwandaka mpofo, yandi vwandaka Catholique, na lukwikilu. Mpe yandi—yandi telemaka na ndonga, mpe mu

talaka yandi. Mpe mu tubaka, “Nkumbu ya nge kele *kingandi*, John Rhyn.”

“Yinga.”

“Nge kele mulombi na nsongi. Nge vwandaka mpofu, bamvula mingi.”

“Yinga. Ya kele kieleka.”

“Nge kele muntu ya Katolika, na lukwikilu.”

“Ya kele kieleka.”

116 Mu tubaka, “MUTINDU ME TUBA MFUMU. Nge me kuzwa kubeluka ya nge.”

Yandi tubaka, “Matondo na nge, tata.”

Mu tubaka, “Matondo na Mfumu.”

Yandi tubaka, “Kasi mu lenda mona ve.”

Mu tubaka, “Yina kele na kima ve ya kusala na yawu. Nge me beluka.” Mpe yandi tubaka. . .

117 Yandi kulumukaka, kuna. Bawu sadisaka yandi na kukatuka estrade. muntu ya yinza lendaka ve kumona kima mosi. Ba lendaka ve kumona ata bandandu na yawu, ata fyoti ve. “Kasi,” yandi tubaka, “yandi kele kaka mpofu mutindu yandi vwandaka ntete.”

118 Na yawu zole ya bankundi ya yandi vutulaka yandi mpe tulaka yandi dyaka na ndonga ya bisambu, mpe nataka yandi dyaka. Howard bikaka yandi kuluta. Ntangu yandi vutukaka dyaka, yandi tubaka, “Tata, nge tubaka na munu ti mu me beluka.” Mu tubaka, “Nge tubaka na munu ti nge kwikilaka munu.”

119 Yandi tubaka, “Mu ke kwikila nge. Mu ke na dibanza ve ya kukwikila nge ve.” Yandi tubaka, “Nge me tuba na munu bima nyonso na luzingu ya munu.” Mpe yandi tubaka, “Mu zaba ve yinki kusala.” Yandi tubaka, “Ya vwandaka na kento na manima kuna, yina vwandaka pesa kimbangi. Mpe yandi vwandaka na goitre, baminuti fyoti me luta, mpe ya me kwenda.”

120 Mu tubaka, “Na yina, kana nge ke kwikila munu, samu na yinki nge ke pesa munu kyuvu? Mu ke na kutubaka na nge Ndinga ya Nzambi.”

121 Yandi tubaka, “Yinki mu fwana sala, tata?” Na kuzabaka ti yandi vwandaka Catholique, mpe zolaka kuzwa kima ya nsuni yina yandi zolaka simba, mu tubaka, “Landila kaka na kupesa kimbangi, ‘Na bamputa ya Yandi mu me beluka,’ mpe pesa Yandi lukumu.”

122 Kiboba ya bakala, basabala zole yina landaka, to tatu, yandi telemaka na nsongi mpe yandi vwanda teka bazulunale. Yandi vwanda boka, “Nsangu ya mfunu! Nsangu ya mfunu! Lukumu

na Mfumu! Mu me beluka! Nsangu ya mfunu! Nsangu ya mfunu! Lukumu na Mfumu! Mu me beluka!”

¹²³ Ntangu yandi vutukaka na lukutakanu na nkokila yina landaka, na mpasi mu lendaka longi, samu na yandi. Yandi ke telama mpe ke boka, “Muntu nyonso kuvwanda swi! Lukumu na Mfumu, na kubelusaka munu! Lukumu na Mfumu, na kubelusaka munu!” Mutindu Catholique, yandi zabaka ve mutindu ya kusimba lukwikilu, kasi yandi zabaka kana yandi landilaka na kutuba yawu, mpe yandi landilaka, landilaka, landilaka, tii sens yina ya sambanu zolaka kota na kisalu. Ya kele kieleka. “Lukumu na Mfumu, na kubelusaka munu!”

¹²⁴ Yandi vwandaka ya kutelama na nsongi, vwandaka boka, “Lukumu na Mfumu, na kubelusaka munu! Nsangu ya mfunu! Lukumu na Mfumu, na kubelusaka munu!”

¹²⁵ Mpe yandi vwandaka tambula na bala-bala. Mpe mutindu muntu ke kwiza, ke tuba, “Wapi faso, Jean?”

¹²⁶ “Lukumu na Mfumu, na kubelusaka munu! Mbote mingi.” Mpe ba vwanda seka yandi, mpe ba vwanda moke yandi.

¹²⁷ Mpe mwa muteki bazulunale yankaka nataka yandi na salon de coiffure, samu na kuzengisa mandefo, pene ya basabala zole to tatu na ntwala, katuka lukutakanu. Mpe coiffeur me tula yandi na kiti, mpe tulaka sabuni na kizizi ya yandi. Mpe yandi tubaka, “Jean,” yandi tubaka, “Mu me bakula . . .” Mwa mutindu ya muntu ya mayela mingi, mpe yandi tubaka, “Mu me bakula ti nge vwandaka kuna samu na kumona munganga ya Kinzambi ntangu. . .” [Kisika ya mpamba na bande—Mu.] “. . . awa.”

Yandi tubaka, “Yinga, mu kwendaka kuna.”

¹²⁸ Yandi tubaka, “Mu me bakula ti nge me beluka,” kaka samu na kumoke yandi.

¹²⁹ Mpe kiboba yango tubaka, “Yinga. Lukumu na Mfumu! Yandi belusaka munu!” Mpe meso ya yandi me zibuka. Na mbala mosi yandi me bika kiti ya coiffeur yina, na kitini ya lele na ziunga ya laka ya yandi. Coiffeur vwanda meka na kusimba yandi, na lutebo na diboko ya yandi, mpe kuna na bala-bala bawu kwendaka. Samu na yinki? Ndinga ya Nzambi kotaka na kisalu.

¹³⁰ Ntwenya ya kento Georgie Carter yina vwandaka ya kulala kuna, yina beno nyonso zaba. Bantu yankaka awa, zaba mbote. Vwandaka ya kulala kuna bamvula yivwa mpe bangonda nana, kima ve vwandaka ya kusala kana kaka kusobisa yandi aleze, samu na luketo mpe misopo. Yandi vwandaka na bakilo kumi sambanu. Yandi vwandaka ya kulala kuna na Milltown, na Indiana.

Mpe bantu ya yandi vwandaka ya dibuundu yina . . . Ntangu mu kwendaka na lukutakanu mosi kuna na dibuundu ya ba-Baptiste ya Milltown, mpe mu sambilaka samu na bambevo,

dibuundu yina tubaka, “Kana mambele mosi ya dibuundu yayi kukwenda na fanatiki yina, beto ke tula bawu na nganda.” Mpe tata ya yandi vwandaka diakre.

¹³¹ Kasi mwana-kento vwandaka na mwa buku ya munu, yina ba bokilaka, *Yesu Mutindu Mosi Mazono, Bubu yayi, Mpe Kukonda nsuka*. Mpangi Hall nataka munu na yandi, na manima ya midi mosi. Mama ya yandi basikaka na yinzo, yandi vwandaka ve na kima ya kusala na yawu. Mu kotaka mpe sambilaka samu na yandi. Yandi tubaka, “Mbote, wapi mutindu samu na mwana-kento yina Nail?” Yandi zabaka vision.

¹³² Mu tubaka, “Yina vwandaka vision, mpangi-kento. Mu lenda sambila kaka. Nge ke na lukwikilu.” Mwa ntwenya yayi ya mawa kuzwaka malongi ya mutindu yankaka na yawu.

¹³³ Mwa bilumbu na manima, mu vwandaka ya kutelama kuna, vwandaka botika. Yandi vwandaka kuna, vwandaka dila. Yina, yandi silaka ti yandi ke kwiza mpe yandi ke baka dyaka mbotika, na Nkumbu ya Yesu Klisto, kana Nzambi lendaka belusa yandi kaka.

¹³⁴ Mpe kuna, yandi, mwa makulu ya yandi ya ntama vwandaka kaka pene ya nene mutindu nsesa. Ba vwanda lenda ve kutula yandi na bassin hygiénique. Mama ya yandi, dyaka ntwenya ya kento, vwandaka kuna, ya kulemba na bukikata, mpe bansuki kumaka mpembe, na kotalaka mwana ya yandi ya kento ya kulala kuna, vwanda kufwa malembe-malembe. Tuberculose ya ba-glande ya kento, mpe lutaka nzila nyonso na yandi. Yandi vwandaka na bakilo kumi na sambwadi, mu banza ti ya vwandaka, ba fundisaka yandi. Ba vwanda lenda dyaka ve kutula yandi bassin hygienique na yisi ya yandi. Na yawu ba zolaka tula aleze na yisi ya yandi, mosi ya kawusu. Bamvula yivwa mpe bangonda nana, yandi vwandaka ya kulala kuna, yandi vwandaka na lenda ve ya kutelemisa yintu ya yandi samu na kumona yinti yina vwandaka pene-pene ya nela.

¹³⁵ Kilumbu mosi, mu vwandaka kuna na manima, na zulu ya mongo, na George Wright, Mpeve-Santu tubaka na munu, “Telama.” Mpe mu talaka, mpe ya vwandaka na Nsemo yina vwandaka sema na kulutilaka na yinti cornouiller. Yandi tubaka, “Kwenda na lweka ya Wright. . .” To, “Kwenda na lweka ya Carter.”

¹³⁶ Ntangu mu kumaka kuna, Mfumu Yesu talisaka mama ya yandi kidimbu ti mu vwandaka kwiza. Mu me belama na mwana-kento yina vwandaka ya kulala kuna na zulu ya mbeto yina, ya kulemba mingi ti yandi vwandaka lenda ve kutelemisa mbungu ya kulosa mate. Mama ya yandi vwandaka ya kusimba yawu. Yandi, “Uh,” vwandaka meka na kulosa mate na mbungu, na tuberculose. Mu tubaka, “Mpangi-kento Georgie. Yesu Klisto, Mwana ya Nzambi, me kutana na munu kuna na ntoto ya kuyuma, pene ya ndambu ya ngunga me luta, mpe me tuba na

munu na kukwiza tentika maboko na zulu ya nge. MUTINDU ME TUBA MFUMU. Telama.”

¹³⁷ Sens ya sambanu kotaka na kisalu. Ngolo bulaka mwana-kento yina. Ya mbala ya ntete na mvula tatu . . . to bamvula yivwa mpe—mpe bangonda nana, yandi telamaka ntete na makulu ya yandi. Yandi dumukaka na makulu ya yandi. Yandi kimaka mbangu na ngaanda, mpe sakumunaka bayinti mpe matiti, mpe kima nyonso, mpe kotaka mpe vwandaka na piano, bandaka na kubula, “Ya kele na Yinto ya kufuluka na Menga, yina basikaka na misisa ya Emmanuel.”

Samu na yinki? Mabanza zolaka losa . . .

¹³⁸ Mwana-kento lendaka kusala yawu ve. Mu zaba ntangu yayi ve. Mu ke zaba ata fyoti ve. Kaka Ngolo ya Nzambi yina simbaka yandi. Makulu ya yandi vwandaka ve nene mutindu *yina*, awa na zulu ya kisika ya kuvukana; kima ve mutindu yawu, mutindu kaka nsesa. Yina me vwanda mwa bamvula kumi na zole me luta, to kumi na yiya, mpe bubu yayi yandi kele na ngolo mpe na mavimpi ya mbote, ke zinga samu na Mfumu Yesu.

¹³⁹ Yinki ya vwandaka? Mbala ya ntete, ya vwandaka ve na kima yina zolaka salama, kasi mabanza zolaka tuba ti ya zolaka salama ve. Kasi, mpangi-bakala, yandi kangama na Ndinga yina. Kana Nzambi lendaka baka mwana-kento yina ya kikata, kuna na Salem, mwana-kento yina Nail, yina vwandaka kikata mpe kikata, mpe maboko ya yandi vwandaka diembela mutindu *yina*, lendaka belusa yandi, Yandi lendaka belusa yandi, mpe. Yandi kwikilaka yawu.

¹⁴⁰ Mpangi Hall, ya kulala kuna, vwanda kufwa na cancer. Muntu yina mosi nataka munu kuna. Dokotolo ya yandi, na Milltown, fidisaka yandi na dokotolo yayi na New Albany, na yisi awa, ya kele kuna na Lupitalu ya Santu Edwards. Mu me zimbana . . . Yandi nataka bana ya munu; muntu ya mbote, dokotolo ya mbote. Yandi talaka yandi. Yandi tubaka, “Cancer.” Yandi tubaka na Docteur Brown, kuna na Milltown, yandi tubaka, “Yandi ke na kufwa.”

Docteur Brown tubaka, “Mu banzaka mutindu yina.”

¹⁴¹ Ba nataka yandi na mpangi ya yandi ya kento, na yisi awa, yina kele muntu ya dikanda ya Tata Kopp, yina vwandaka zuzi na mbanza. Mpe ntangu yandi kumaka kuna, yandi tubaka, “Beno bumba kaka yandi awa tii yandi ke kufwa.”

¹⁴² Mpe ba fidisaka na kwiza baka munu na kukwenda kuna. Mu kwendaka, kilumbu na manima ya kilumbu, na kento ya munu, na manima kuna. Beto sambilaka samu na Mpangi Hall. Mu zolaka yandi. Yandi vwandaka mosi ya bandimi ya munu na Klisto. Mpe yandi vwanda lutila na kulemba mpe kulutila kulemba, mpe yandi vwanda lenda ve kuningisa maboko ya yandi.

Mama Hall tubaka, “Billy, ya kele na kima yina nge lenda sala?”

¹⁴³ Mu tubaka, “Ya kele na kima ve mu zaba, Mpangi-kento Hall. Mu ke na kuwa ata mpova mosi na Mfumu. Beto ke...” Mu tubaka, “Mu ke zola dokotolo ya munu kutala yandi.”

Yandi tubaka, “Nani kele dokotolo ya nge?”

Mu tubaka, “Docteur Sam Adair.”

¹⁴⁴ Mpe mu bokilaka Sam. Sam tubaka, “Kima kaka mu lenda sala, mu lenda fidisa yandi na Louisville, Billy, samu na minzenzi ya radiographie mpe nyonso yina.” Yandi tubaka, “Mu ke pesa nge mukanda.” Ba fidisaka ambulance, ba zangulaka yandi, nataka yandi, vutulaka yandi.

¹⁴⁵ Sam bokilaka munu, mpe tubaka, “Billy, yandi kele na cancer ya dizafu. Beto lenda zenga ve dizafu ya yandi, mpe ti yandi kuzinga.” Yandi tubaka, “Yandi kele mulongi, yandi fwana vwanda ya kukubama mbote ntangu yayi. Nge ke sala mbote na kutuba na yandi ti yandi ke kufwa.”

¹⁴⁶ Mu tubaka, “Yandi me kubama na kukwenda, Sam. Kasi, kima ya yawu kele ti, mu zola kaka ve kumona yandi kukwenda. Yandi kele mpangi ya munu ya bakala, mpe mu zola yandi.”

Mu banzaka, “O Nzambi, sala kima mosi samu na munu.”

¹⁴⁷ Mu vwanda kubama na kukwenda kuzomba bampadi, na suka yina. Mu talaka kuna, na ntuala ya kilumbu, muntu mosi ve vwandaka na ngaanda ya lupangu. Mu bakaka munduki ya munu mpe mu bandaka na kusabuka yinzo. Ya vwandaka na pomme mosi ya ntama ya ngolo yina vwandaka na zulu ya kibaka. Mu banzaka, “Samu na yinki Meda tulaka yawu na kibaka?” Mu talaka, mpe yankaka mpe yankaka mpe yankaka, tii sambanu ya bawu vwandaka kuna. Mu katulaka yimpu ya munu mpe fukamaka, na ntoto. Mu talaka na zulu kuna, mpe kuna pomme ya nene ya kitoko mingi me kulumuka mpe me kudya ba-pomme yango nyonso. Mu talaka, ya kutelama na zulu kuna, mpe ya vwandaka na Nsemo mosi yango (yina vwandaka na foto yango kuna) vwandaka ya kutelama kuna, vwandaka balukaka ziunga-ziunga. Yandi tubaka, “Telama. Kwenda, tuba na Tata Hall, ‘MUTINDU ME TUBA MFUMU, yandi ke kufwa ve, kasi ke zinga.’”

¹⁴⁸ Mu kwendaka kuna mpe tubaka na yandi. Yandi vwandaka ya kuswaswana ve, kasi yandi kwikilaka yawu. Yandi kangamaka na yawu. Ya vwandaka ve na luswaswanu, ya monanaka mutindu yina. Kilumbu mosi lutaka, luswaswanu mosi ve. Kilumbu ya zole, luswaswanu mosi ve. Pene ya kilumbu ya tatu, ya bandaka. Mpe yandi yayi awa, ke zinga bubu yayi, na manima ya bamvula mpe bamvula.

¹⁴⁹ Beno tala, ya kuvwanda kaka awa, Mama Weaver, kana mu me zimbana ve, ntangu mwana ya yandi ya kento kwizaka, na

manima ya kubeluka ya Margie Morgan, mu kwendaka kuna, mpe ya vwandaka ve na kima yina kento yina zolaka sala, yandi zolaka kufwa na bangunga fyoti ke landa. Ba vwandaka sala yandi ntumbu mosi, to zole, ba zolaka pesa yandi, mpe yina vwandaka nyonso. Ba salaka yandi lipaso na bima ya bakento, cancer lutaka na mukongo ya yandi. Ba panzaka yawu ntangu ba salaka yandi yawu. Ya vwandaka ve na kima ya kusala samu na kento yina. Mu wanda zola kuzonza na yandi na yina me tala kubeluka ya nzutu.

¹⁵⁰ Kasi yandi tubaka, “Tata, nge kele mulongi ya Mfumu Nzambi, mpe mu kele ya kulunga ve ti nge kota na yinzo ya munu.” Na kutangaka yandi mosi ya kulunga ve, samu na mulongi na kukwiza. Yandi tubaka, “Mu me zinga luzingu. Mu me bina. Mpe mu me sala bima yina mu zolaka sala ve. Mu me sadila nzonzolo ya yimbi, to nyonso yankaka.” Yandi tubaka na munu masumu ya yandi. Mpe yandi tubaka, “Mu kele ve ya kulunga samu na yawu.”

¹⁵¹ Mu monaka ti yandi vwandaka bula na nzila ya mbote. Yandi zolaka kuzwa Klisto na kati *awa*, na ntwala ya ya yina ya sambanu, sens ya kulutila zolaka kota na kisalu.

¹⁵² Beto fukamaka. Mu solulaka na yandi, na yina, “Ata ti masumu ya nge kele mbwaki mingi.” Yandi pesaka luzingu ya yandi na Mfumu Yesu Klisto. Mpe ntangu yandi salaka yawu, yandi tubaka, “Oh, oh, mu ke kuwa mutindu yankaka. Kima mosi me salama na munu. Kima mosi me salama na munu. Mu zola kupesa mbote na beno nyonso.”

¹⁵³ Kaka na yina mu vwandaka tala kuna mpe mu monaka yandi na vision, vwandaka vutuka na manima ya yinzo na yinzo ya bansusu. Mu tubaka, “Mama Weaver, MUTINDU ME TUBA MFUMU NZAMBI, nge ke sala nzyetolo na yinzo yina bansusu, mpe nge ke zinga.”

¹⁵⁴ Yandi zolaka landa ve mutindu yandi vwandaka kuwa; cancer vwanda me kudya yandi. Yandi zolaka kwenda ve na lweka ya yina dokotolo tubaka; yandi vwanda kufwa. Mpe ya vwandaka, mu banza, bamvula kumi na yiya, kumi na tanu me luta, Mama Weaver? [Mama Weaver me tuba, “Kumi na yiya.”—Mu.] Bamvula kumi na yiya me luta. Yandi vwanda pepila na tabernacle yayi ntangu yandi vwandaka ya kubela, ya monanaka ve ti yandi vwandaka na kiyeka ya kubasika na mbeto, mwa maboko ya fyoti ya nkulu, samu yandi silaka na Nzambi ti yandi ke kwiza mpe ke baka mbotika na Nkumbu ya Yesu. Beto basisaka yandi na kiti ya bambevo, to, na kiti, kotisaka yandi na kiziba ya maza mpe botikaka yandi na Nkumbu ya Yesu. Mpe kuna yandi kele ya kuvwanda, na nkokila yayi. Beno tala yandi, kana beno zola kumona nyonso ya mavimpi ya mbote. Samu na yinki? Na kulosaka mabanza mpe kusosa-sosa ya science, mpe

kima nyonso yankaka, samu ti sens ya sambanu kotaka na kisalu. Yawu yina.

¹⁵⁵ Beno tala, beno bika mu tuba kaka yayi, dyaka, kaka minuti mosi. Yesu lutaka na yinti mosi, kilumbu mosi, mpe ya vwandaka yinti ya fike. Mpe Yandi talaka yinti ya fike. Ntangu yayi, lemvo ya beno, beno kondwa yayi ve. Yandi talaka yinti ya fike, mpe ya vwandaka ve na bafike na zulu ya yawu. Mpe Yandi tubaka... Yandi singaka yinti, mpe tubaka, "Ti muntu ve kudya na nge."

¹⁵⁶ Bilandi talaka na ziunga; yinti vwandaka talana mutindu ya vwandaka ntangu nyonso. Ngunga mosi na manima ya yina, ya vwandaka talana kaka mutindu mosi. Nzambi zibulaka ata fyoti ve ntoto mpe minaka yawu. Nzambi fidisaka ata mbala mosi ve mwinda ya zig-zag na mazulu mpe yokaka yawu na kukumisa yawu makala. Yandi zolaka sala yawu. Kieleka, Yandi zolaka. Yandi salaka ata fyoti ve bima yina.

¹⁵⁷ Yinki salamaka? Ba singaka yinti. Lukwikilu ya Nzambi teleminaka luzingu ya yinti yina. Ya vwandaka ve na kima mosi ya nsuni yina beno zolaka mona. Kasi kuna na yisi ya ntoto, na yisi ya misisa ya yinti, lufwa vwandaka kota. Yawu singamaka. Sens ya sambanu me telemina yawu. Ya zolaka kufwa. Ya bandaka na kufwa, na bansimbulu.

¹⁵⁸ Ya kele kima mutindu mosi ke salamaka na cancer. Ya kele kima mutindu mosi ke salamaka na kuvimba. Ya kele kima mutindu mosi ke salamaka na konso kimbevo, ntangu sens yina ya sambanu ya ngolo ya Mfumu Nzambi ke telama na kutelemina yawu. Yandi ke tuba, "Satana, basika kuna." Beno lendaka mona ata kondisyo ya nsuni kusalama kaka kuna, kasi lukwikilu yina ke simba kaka kuna mutindu mosi. Ba me singa yawu. Sens yina ya sambanu ke vwanda ve, sens yina ya kulutila ke bika yawu ve. Ya ke kipe ve mutindu beno ke kuwa, mutindu beno ke tala, mutindu beno ke sala. Ya ke vwanda ve na kima mosi ya kusala na yawu. Ba me tula Ndinga ya Nzambi. Sens ya sambanu ke simba yawu. Kaka yina. Yandi ke kota na kisalu; cancer ke banda na kubeba malembe-malembe. Ya ke kufwa na bansimbulu, mpe ya me kwenda. Kieleka.

¹⁵⁹ Na nzila mosi ya sens ya kulutila yayi ya ngolo, bimfumu me kufwa, yandi me bwisa kibaka mosi na yankaka.

¹⁶⁰ Na nzila ya sens yayi ya sambanu, Mubu ya Mbwaki vutukaka manima, mpe ntoto ya kuyuma salaka nzila na bana ya Nzambi na kutina.

¹⁶¹ Na nzila mosi ya sens ya sambanu yayi, Samson teleminaka funda ya ba-Philistin na minduki mpe bambele. Yandi vwandaka ve na mutindu ya kutelemina yandi mosi, kasi mukwa ya mulet ya mfinda. Mpe sens yina ya sambanu kotaka na kisalu, mpe yandi bulaka funda ya ba-Philistin. Alleluia!

¹⁶² Na nzila ya sens yayi ya sambanu, bantu ya kufwa vumbukaka. Na nzila ya sens yayi ya sambanu, bimangu ya ngolo salamaka.

¹⁶³ Ya kele ngolo ya kulutula ngolo yina me bulaka ntete ve ntoto, ya kele sens yina ya kulutula, yina ba ke bokilaka, sens ya sambanu. Ya kele ve na kima ya kusala na *yayi* na yisi awa. Kana yayi na yisi awa me tuba yawu, mpe me tuba “amen” na Yawu, mbote mingi, beno ke na kwenda na ntuala. Kasi ata nyonso yina yayi ke sala, kukwikila *Yawu*. Ya kele kisika ngolo, “kana nge kwikila na kati ya ntima ya nge.” Sens ya beno ya tanu, ya kubanza, kele na kati ya yintu ya beno, kasi sens ya beno ya sambanu kele na kati ya ntima ya beno. Beno ke kwikila na ntima ya beno. Funguna ke salamaka na yinwa. Beno ke kwikila na ntima ya beno, yinga, tata, sens yina ya sambanu, ngolo yina ya kulutula ngolo.

¹⁶⁴ Beno kuwa. Samu na sens yina ya sambanu, ya vwandaka na profete mosi ba losaka na dibulu ya bankosi. Mpe samu na sens yina ya sambanu, bankosi lendaka ve na kudya Daniel. Ba lendaka ve. Ba lendaka ve kubelama na yandi, samu na sens yina ya sambanu, sens yina ya kulutula.

¹⁶⁵ Na nzila ya sens yina mosi ya sambanu, ba losaka bana tatu ya ba-Hebreux na dibulu ya tiya, mpe bawu teleminaka milaka ya dibulu ya tiya. Sens yango ya sambanu! Mabanza nyonso zolaka siamisa ti ba ke yokama na lufwa na ntuala ba kuma na yawu, kasi sens yina ya sambanu bumbaka bawu kuna bangunga zole to tatu. Mpe ntangu bawu zibulaka dibulu ya tiya, bawu monaka Mosi ya kutelama na kati-kati ya bawu, mutindu Mwana ya Nzambi. Yina kele sens ya sambanu. Tiya zolaka yoka bawu ve. Yinga, tata.

¹⁶⁶ Ya vwandaka sens mosi yango ya sambanu, kilumbu mosi, ti Ntumwa Pierre vwandaka ya kulala na boloko, mpe ba zolaka zenga yandi yintu, kilumbu yina vwandaka landa, mpe kuna na yinzo ya Jean Marc bawu vwandaka na lukutakanu ya bisambu. Sens yina ya sambanu bandaka na kukuma nene pene-pene ya boloko yina, kisika yandi vwandaka ya kufuka na bisambu. Sens yina ya sambanu kotaka na kisalu. Dikunzi ya Tiya kwizaka na nela mpe simbaka Pierre, mpe tubaka, “Kwiza, basika awa.” Sens ya sambanu!

¹⁶⁷ Ya vwandaka sens yina ya sambanu yina zolaka bika ve Santu Paul kudyama na mubu yina ya ngolo, ntangu mwa bwatu yina vwandaka ya kufuluka na maza. Ya vwandaka sens ya sambanu yina bumbaka yandi na kudyama, sens yina ya kulutula. Ya vwandaka sens yina ya sambanu, ti, ntangu nyoka tatikaka yandi na diboko, yandi ningisaka yawu na tiya. Ya vwandaka sens ya sambanu yina salaka yawu.

¹⁶⁸ Ya vwandaka sens yina ya sambanu yina vumbulaka Yesu Klisto na lufwa, na manima Yandi lalaka na ntoto, samu ti Yandi

kwikilaka Ndinga ya Nzambi. Yandi tubaka, “Beno bebisa nzutu yayi, mpe mu ke vumbula dyaka yawu na kilumbu ya tatu. Samu ti David tubaka, ‘Mu ke bika ve Santu ya Munu kumona kupola, to dyaka Mu ke bika moyo ya Yandi na difelo.’” Ya vwandaka sens yina ya kulutila. Beno losa mabanza ya ba-sens *yayi*. Beno kwikila sens ya kulutila, sens ya lukwikilu, yina Yesu Klisto ke pesaka.

¹⁶⁹ Na nzila ya sens yina mosi, Nzambi tubaka ntangu kima mosi vwandaka ve. Yinki kele sens yina? Sens yina ya kulutila kele Nzambi, lukwikilu ya Nzambi na kati ya beno, kitini ya Nzambi yina ke kwiza na kati ya beno, ke pesa beno sens ya kulutila. Na nzila ya sens yina mosi, Nzambi kangaka yinza kintwadi na bima yina vwandaka ve mpe yina monanaka ve. Yandi tubaka Ndinga ya Yandi mpe kwikilaka Ndinga ya Yandi, mpe yinza ninganaka na luzingu. Nkembo!

¹⁷⁰ Sens ya sambanu, sens ya kulutila, O Nzambi, mwangisa yawu na zulu ya munu. Pesa yawu na munu mpe na muntu nyonso yina ke na yawu nsatu. Mwangisa sens ya Nge ya sambanu na kati ya munu, Mfumu. Mu zola kubika batanu yayi, luzabu ya munu mosi, bangindu, kulosa mabanza nyonso, Mfumu. Bika ti Ndinga ya Nge kuvwanda kieleka, mpe ndinga ya muntu nyonso luvunu. Mabanza nyonso, ntembe nyonso, kuvwanda ya kulosa, mpe ti mu tambula na kulandaka sens ya kulutila, sens ya Mpeve-Santu.

¹⁷¹ Beno zola yawu ve? Ya kele kima yina beto zola. Nzambi sakumuna beno, bankundi. Yawu yina beno ke na yawu nsatu. Sens yina ya kulutila ke lomba kima mosi, mpe yawu zaba ti Yandi ke pesa yawu. Yawu me ndimisama. “Samu ti yandi yina ke kwiza na Nzambi fwana kwikila ti Yandi kele, mpe yandi yina ke pesaka musendo na bayina ke sosaka Yandi.”

¹⁷² Kana sens ya sambanu me tuba, “Nzambi ke zitisaka Ndinga ya Yandi. Mu ke kukipesa munu mosi na Yandi. Mu ke pesa nyonso yina kele na munu, na Yandi. Sens ya munu ke tuba yayi ke salama, lukwikilu ya munu na Ndinga ya Nzambi.” Na yina, beno bokila kima nyonso yankaka, ya kuswaswana na yawu, mutindu ti ya vwandaka ve.

¹⁷³ Abraham kutanaka na Nzambi, mpe Nzambi tubaka, “Nge ke kuzwa bébé na nzila ya Sarah.” Mpe yandi bamvula makumi sambwadi na tanu, mpe yandi makumi sambanu na tanu. Abraham bokilaka nyonso yina vwandaka ve, vwandaka ya ku...vwandaka ya kuswaswana na yawu, mutindu ti ya vwandaka ve. Yandi tambulaka mutindu kana yandi monaka Nzambi, mpe yandi—yandi kwikilaka.

¹⁷⁴ Yandi bokilaka nyonso yina tubaka ti yandi zolaka ve, mabanza nyonso, kima nyonso yankaka yina...Dokotolo lendaka tuba, “Kasi, Abraham, nge me nuna mingi samu na kusala yawu.” Yina ke sala luswaswanu ve yina dokotolo me

tuba, yina muntu nyonso yankaka ke tuba, yina mabanza ya yandi mosi ke tuba, yina kima nyonso yankaka ke tuba. Nzambi vwandaka ya kusungama, mpe yandi kangamaka na yawu.

¹⁷⁵ Yina kele sens ya sambanu, sens ya kulutila. “Nzambi, pesa munu yawu. Nzambi, bika mu kuzwa ya kulutila ya yawu,” samu na kulonga na bantu ya Yandi, ya kele kisambu ya munu.

¹⁷⁶ Na suka yayi, ntangu mama yina nataka bébé yina ya fyoti, na yintu ya mbwaki, ya kutelama awa, masa ya meso vwandaka kulumuka na matama ya yandi. Mu tubaka, “Yinki kele dyambu, mpangi-kento?”

¹⁷⁷ Yandi tubaka, “Mpangi Branham, yandi kele na leucemie.”

Mu kuwaka kima mosi kutelama. Oh! “Yandi kele lusalusu ya kieleka na ntangu ya mpasi.”

¹⁷⁸ Awa ntama mingi ve, Billy mpe munu vwandaka tambula na nzila, na kunataka ditoma. Mwa bana ya babakala ya ndombe kwizaka na nzila, mpe bawu vwandaka nata mbangu. Mpe bawu tutaka ditoma mosi na lweka, mpe balukaka, balukaka, balukaka, mpe losaka bana ya babakala na lweka ya nzila. Mpe ntwenya mosi ya bakala vwandaka ya kukangama na yisi ya ditoma, na mukongo ya yandi ya kulala na ditoma. Bana ya babakala yankaka dumukaka mpe bandaka na kuvumbula yawu. Yandi tubaka, “Oh, pardo beno sala yawu ve! Mukongo ya munu ke na kubukana! Ve! Beno ke kufwa munu! Beno ke kufwa munu! Beno sala yawu ve!”

¹⁷⁹ Mpe bawu tubaka, “Oh, beto fwana katula yawu na nge. Ya ke na kubakaka tiya.”

¹⁸⁰ Yandi tubaka, “Beni bika . . . Beni ningisa yawu ve. Beni ke na kupesa munu kikesa na lufwa! Beni sala yawu ve! Beni sala yawu ve!”

Mu bokaka na yisi kuna, “Mwana, nge kele Muklisto?”

Yandi tubaka, “Ve, tata.”

Mu tubaka, “Nge ke sala mbote na kusambila.”

Yandi tubaka, “Yinga, tata.”

¹⁸¹ Sens ya sambanu kotaka na kusalu. Mu tambulaka kaka na kubalukaka na manima ya ditoma. Mpe mu ke zaba ata fyoti ve tii na Lufundusu. Kasi, na mbala mosi, ditoma yina me sala makelele, mpe me katukila yandi. [Mpangi Branham me bula misapi ya yandi—Mu.] Mpe yandi dumukaka mpe vwandaka mbote mingi. Yinki ya vwandaka? “Lusalusu yina kele na ntangu ya mpasi.”

¹⁸² Beto katukaka . . . Mama mosi ya ntwenya ya ndombe vwandaka nata ditoma na nzila, Plymouth ya malu-malu, pene ya bakilometele bankama sambanu na ndambu na zulu ya yawu. Yandi vwandaka nata ditoma na mbangu na kutala. Mpe mu monaka ditoma. Ya nataka vilebrequin ya yawu nyonso na yinti.

Billy mpe munu kusutopeke. Ya vwandaka nzila mosi ya mvula-mpembe, ya kulengula na ntwala ya beto, kasi ya vwandaka ya kuyuma na ntangu yina. Mwana-kento. . . Mipepe vwandaka bula ngolo mingi, kuna na Minnesota, ti ya nataka ditoma. Nge ke bambuka moyo na yawu, Billy. Mu kwendaka mbangu kuna na yandi. Mpe, kuna, yandi vwandaka ya kuvwanda kuna. Yandi tubaka, “Oh, mu ke na kufwa. Mu ke na kufwa.” Ba bokilaka ambulance.

¹⁸³ Ambulance kwizaka, mpe bawu vwandaka na muntu ya kufwa ya kulala kuna na manima ya ambulance. Yandi tubaka, “Mu lenda baka yandi ve.”

¹⁸⁴ Mpe na yawu kisadi-bilanga tubaka, “Mbote, beno fidisa muntu yankaka, na nswalu. Kento yango ke na kufwa.”

Mu kwendaka kuna. Mpe mu tubaka, “Mama, vingila fyoti.”

¹⁸⁵ Yandi tubaka, “Oh, kusimba munu ve, tata. Kusimba munu ve. Mukongo ya munu!”

¹⁸⁶ Mu tubaka, “Mama, nge kele Muklisto?” Yandi talaka munu. Mpe mu tubaka, “Mu kele mulongi ya Nsangu ya mbote. Kana nge ke na kufwa, wapi mutindu nge mpe Nzambi kele?”

Yandi tubaka, “Tata, mu zola kuvwanda mbote, ntangu yayi.”

¹⁸⁷ Mpe sens ya sambanu kotaka na kisalu. Ngolo ya Nzambi kulumukaka. Yandi lendaka kubasika na ditoma, kukondwa muntu kusadisa yandi. Ngolo ya Nzambi, na kuvwandaka, “Lusalusu yina kele na ntangu ya mpasi.”

¹⁸⁸ Beto ke tambula na lukwikilu. Beto ke zinga na lukwikilu. “Muntu ya kusungama ke zinga na lukwikilu.” Beto fwana zinga mutindu yina. Bantu yikwa zola kuzwa mingi ya ya sambanu, ya sens ya kulutila?

Na yina beto kulumusa bayintu ya beto, na yina beto ke sambila.

¹⁸⁹ Mfumu ya ntalu, Nzambi ya beto mpe Tata ya beto, Nge kele mbote mingi samu na beto. Nge pesaka beto ba-sens tanu ya kuzingila mpe na kutambula, na ntoto yayi, to na—to na kusimba ntoto. Beto lenda kuwa bima yina—yina ba fwana kuwa, na maboko ya beto, bima yina ba lenda simba. Nge pesaka beto kuwa, ti beto lenda kuwa. Beto kele na kyese mingi samu na yawu, ti beto lenda kuwa Ndinga ya Nzambi, mpe, na nzila ya yina, “Lukwikilu ke kwizaka na nzila ya kuwa, na kuwa Ndinga ya Nzambi.” Beto ke vutula matondo samu na ba-sens yayi sambanu, Mfumu. Ti beto bumba yawu, bilumbu ya luzingu ya beto nyonso.

¹⁹⁰ Kasi ti sens yayi ya kulutila, ti sens ya lukwikilu, yina kele ya mukwikidi, samu ti yandi fwana vwanda na yawu samu na kukwikila. Mfumu, pesa beto mingi ya yawu. Oh, vedisa yawu, Mfumu, mpe meka beto, mpe fulusa beto na bumbote ya Nge

mpe ngolo ya Nge. Ti beto tambula bilumbu nyonso ya luzingu ya beto, na nzila ya sens ya sambanu, na nzila ya sens ya lukwikilu, yina ba pesaka kaka na nzila ya Yesu Klisto. Ya kele yina beto ke sambila, bika ti beto kwikila ti beto me kuzwa yawu, kuvwanda na ata ntembe ve na kati ya ntima ya beto, mpe Nge silaka ti ya ke salama.

¹⁹¹ Bayayi me telemisa maboko ya bawu, Mfumu, mu ke sambila samu na bawu. Ba vwandaka na bansatu. Nge zaba yina ba vwandaka. Mu ke sambila ti Nge ke sala ti yawu salama, mosi na mosi ya yawu. Ti yawu salama, nsatu ya bawu. Mu ke lombwa yawu na Nkumbu ya Yesu. Amen.

Lukwikilu na Tata, lukwikilu na Mwana,
Lukwikilu na Mpeve-Santu, tatu yayi kele
Mosi;
Bampeve ya yimbi ke tekita, mpe misumuki ke
vumbuka;
Lukwikilu na Yehowa ke ningisa nyonso.

¹⁹² Beno me kuwaka yawu, ntete? Ntangu yayi kukondwa miziki, kaka minuti . . . ? . . .

Lukwikilu na Tata, lukwikilu na Mwana,
Lukwikilu na Mpeve-Santu, tatu yayi kele
Mosi;
Bampeve ya yimbi ke tekita, mpe misumuki ke
vumbuka;
Lukwikilu na Yehowa ke sala nyonso
kuningana.

¹⁹³ Ya kele kieleka. Oh, la la, lukwikilu ya ntalu, lukwikilu ya ntalu, ya nkembo! Nzambi, pesa munu lukwikilu. “Na lukwikilu, Abraham! Na lukwikilu, Isaac! Na lukwikilu, Abel pesaka na Nzambi munkayulu ya kulutila kitoko na yina ya Caïn, yandi na kuvwandaka dyaka ya kufwa.” Oh, mutindu beto kele na nsatu ya lukwikilu! Mu zola Yandi. Mu zola lukwikilu mingi. Nsatu ya munu na luzingu yayi, mpe samu na mvula yayi ya malu-malu ke na kwiza kele lukwikilu mingi na Nzambi. Nzambi, katula ntembe nyonso yina kele na kati ya dibanza ya munu, kana mosi ke zola kutelama kaka. Satana ke nwana na munu, yandi ke nwana na beno, yandi ke meka na kubula makonga ya yandi, kasi ti mu vwanda na kikunti yina ya nkebolo nzutu ya lukwikilu ntangu nyonso na ntwala ya munu na kutelemina mayela ya dyabulu, samu na—samu na kufwa minduki ya yandi ya tiya na kisambu ya munu ya kieleka. Nzambi sakumuna beno.

¹⁹⁴ Ya kele na kima ya kutuba, Mpangi Neville? [Mpangi Neville me tuba, “Ve, kaka samu na kusamuna dyaka.”—Mu.] Kwiza. 

59-1227^E Sense Ya Kulutila
Branham Tabernacle
Jeffersonville, Indiana U.S.A.

KIKONGO-KITUBA

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kisadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutula mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutula mingi to samu na yina me tadila bisadulu, beno sonikila:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org